

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaannut teknikkikkut allannguutininik arlalinnik imaqarpoq.

Pisortanut akiitsut annertussusiisa annikillisinnissaannik ataatsimoortumik ilungersuuteqarnermut ilaatillugu akiliisitsiniartarnermut suliaasaqarfimmi sunniuteqarluarnerulersitsinissat erseqqissaanissallu arlallit siunnersuutigineqarput. Siunnersuummi pingaarnertut siunnerfigineqarpoq akileraaruseriffiup akiliisitsiniarnissamut periarfissaannik pitsanngorsaanaissaq, peqatigisaanillu innuttaasut inatsisitigut isumannaatsuunerat attatiinnarneqassasoq.

Sunniuteqarluarnerulersitsinissamut siunnersuutit taakkua ilagaat akiliisitsiniartarnermut inatsimmi § 1, imm. 2-p, inatsisit allattorsimaffiannik aammalu inatsisip atuuffissaannut killissaliinermik imaqartup, nutarterneqarnissaa. Kisiannili allattorsimasut sivilunerusumik nutarterneqarsimangillat, tassami § 1, imm. 2-p kingullermik allanngortinneqarnera 2007-imi ingerlanneqarmat. Tamatuma sunniutigaa allattorsimasut atuuttut amigarnerat. Siunnersuummi tamanna iluarsineqarpoq, tassami allattorsimasut atuuttut iluarsanneqarmata, tassani ilaatigut inatsisit amerlanerusut ilanngunneqarlutik. Siunnersuutip tassunga tunngasortaani, akiliisitsiniartarnermut inatsimmi § 2-p annertusitinneqarnissaa pillugu siunnersuummut peqatigitillugu, akileraaruseriffik sunniuteqarluarnerujussuarmik pisortat akiligassiissutaannik akiliisitsiniarnissaa, ullumikkut pisartunit ajornanginnerulersinneqartussaavoq. Ullumikkut akiligassiissutit akileraaruseriffiup tigusai taakku arlallit akilersinniarneqarnerat eqqartuussiviit ikiortigalugit ingerlanneqartarput. Tamatumani akileraaruseriffimmi atortoqarani suleriaatsit isumalluutininik atuiffiusartut akuutinneqartarput, taamatullu eqqartuussivinni isumalluutit killeqartut atorineqartarlutik. Tamatuma saniatigut nunap karsia tamatumunnga atasumik toqqaannartumik aningaasartuuteqartinneqartarpoq, suliaakkiissutinut tamanut eqqartuussivimmut akitsuutit ilusilimmik.

Sunniuteqarluarnerulersitsinissap ilungersuutigineqarneranut nangissutigalugu siunnersuutigineqarpoq ilanngaatiginnissinnaatitaaneq annertusitinneqassasoq, akiligassiissutit ingerlaannartumik ingerlanneqarnerulersumik akilersinniarneqarsinnaangorlugit. Suliaasat ullumikkut akiligassiissutit atortoqarani suleriaatsit isumalluutininik atuiffiusussat atorlugit akilersinniarneqartariaqartarput. Ilanngaatiginnissinnaaneq sakkussaavoq, akileraarutininik utertoortuutininik tunniussisoqartussanngornerani, akileraaruseriffiup angusaqarfiulluurtumik atortagaa. Siunnersuutaavoq aamma akiligassiissutinik pisortat akiliisarnerat pineqartunut ilaatilerlugu, sakkussaq taanna annertusitinneqassasoq. Taamaaliornermi akileraaruseriffiup akiliisitsiniarnermik suliaqarnerata ilaa annertoq ingerlaannartunngortinneqarsinnaalissalluni.

Inuiaqatigiinni nalinginnaasumik, pingaartumillu akileraaruseriffimmi, ineriartorneq ingerlaannartunngortitsineranut digitalinngortitsinermullu sammisumut annertuumik ingerlavoq. Pisortat ingerlatsineranni oqartussanut aallaavigineqarpoq, aalajangiinerni nassiussisup atsiornera allassimassasoq. Tamatumani atortoqarani sulianik ingerlatitsineq ilaatinneqartarpoq, suleriaatsit ingerlaannartunngortinnissaat sunniuteqarluarnerulersinnissaallu ajornakusuulersittarlugu. Taamaattumik siunnersuutaavoq akiliisitsiniartarnermut suliassaqarfimmi atsiornissamut piomasagaatip ilaatinnginnissaanut Naalakkersuisut piginnaatinneqassasut. Tamatumani sulinerup ingerlanera annertunerusumik ingerlaannartunngortinneqarsinnaalluni.

Kalaallit Nunaanni akiliisitsiniartarnerup ingerlaannartunngortinnissaanut ilaatillugu siunnersuutigineqarpoq, Akileraaruseriffiup aningaasarsianit ilanngaatiginninnissaanut killissanik aalajangersaanissamut Naalakkersuisut piginnaatinneqassasut. Aningaasarsianit ilanngaatiginninnermut suliassanik suliarinnittarneq isumalluutitigut oqimaatsuvoq, kisianni akiitsulik akiliisinnaassuseqarnera aallaavigalugu procentiliussamik qanoq annertutigisumik akileeqquneqarsinnaanersoq, killissaliussamik aalajangersaasoqarpat, ingerlaannartunngortinneqarsinnaalluni.

Inatsisissatut siunnersuut siusinnerusukkut Inatsisartunut saqqummiunneqarpoq, kisianni isumalluutitigut tunngavilimmik tunuartinneqarluni. Inatsisissatut siunnersuutit matuma inatsisissamut siunnersuut siusinnerusukkut saqqummiunneqartoq annertunerpaatigut assingaa, akileraaruseriffiup ingerlaannartunngortitsinissamut aammalu aningaasarsianit ilanngaatiginninnerup (aningaasarsianit ilanngaatiginninneq) ingerlanissaanut IT-nik taparserneqartumik, periarfissaqarnerata nalunaarummi maleruagassiiviginissaanut Naalakkersuisut inatsimmi tunngavissinneqassasut siunnersuutigineqassasoq, ilanngunneqarluni.

2. Siunnersuummi immikkoortut pingaarnerit

Kalaallit Nunaanni akiliisitsiniaanermut pingaarnertigut inatsisitigut sinaakutissaq Kalaallit Nunaannut eqqartuussisarnermut inatsimmi immikkoortoq VIII-miippoq. Pinngitsaalliissummik naammassinnitsitsisarneq pillugu maleruagassani taakkunani aningaasanik akiligassiissutinik allanillu piomasagaatinik akiliisitsiniarnissamut piginnaatitaanerup pingasunngorlugit avitaanera allassimavoq. Aningaasanik akiligassiissutinik, pisortat pisassaannik, akiitsorineqartunik akiliisitsiniarnissamut piginnaatitaaneq, Naalakkersuisut ataanni akiliisitsiniartartuniitinneqarpoq, takuuk § 597, imm. 2, takuuk § 598, imm. 2 aamma 3. Pisortanut akiitsut oqartussamit immikkut ilisimasalimmit, soorlu assersuutigalugu akileraaruseriffimmit, akilersinniarneqartarlutik ilusiliaq, nunanit , soorlu Norge-mit aamma Danmarkimit, ilisimaneqarpoq.

Kalaallit Nunaannut eqqartuussisarnermut inatsimmi § 598, imm. 2-mi pisortat aningaasat piomasagaatai immikkuullarissut arlallit, akileraaruseriffiup nammineerluni akilersinniarsinnaasai,

allassimapput, ilanngullugit inissiamut attartornermut, kiassarnermut, innaallagissamut imeqarnermullu akiliutissamik akiliinissamut piumasaqaatit.

Tamatuma saniatigut piumasaqaatit suut akileraaruseriffiup nammineerluni akilersinniarsinnaanera Inatsisartut aalajangersinnaagaat, Kalaallit Nunaannut eqqartuussisarnermut inatsimmi § 598, imm. 3-mi inatsimmi tunngavissiisoqarpoq. Inatsimmi tunngavissaq taanna pingaartumik pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni atorneqarpoq. Siunnersuummi matumani akiligassiinerit, akileraaruseriffimmit akilersinniarneqarsinnaasut, suussusai amerlisillugit annertusitinniarneqarpoq.

Suliassaq akiliisitsiniartarnermut oqartussamut immikkut ilisimasalimmut inissinneqarpat, eqqartuussisarnermut inatsimmi inatsisitigut isumannaatsuutitsinissamut piumasaqaat malittaatinneqartussaavoq. Taamaattumik Kalaallit Nunaanni akileraaruseriffiup, eqqartuussivimmi pisartut assigalugit, ilaatigut pisariaqartitanik atugassaqartinneqarnissaq pillugu eqqartuussisarnermut inatsimmi maleruagassat (§ 618), malittussaavai. Tamanna isumaqarpoq akileraaruseriffiup akiitsoqartup aningaasaqarnikkut inissisimanera eqqarsaatigissagaa, tassami inuk minnerpaamik piisaarfiunngitsumik inuuniarnissamut aningaasaatissaanik qimatsivigineqassammat.

2.1 Inatsisip atuuffissaannik nutarterineq

Siunnersuutigineqarpoq inatsisip atuuffissai nutarterneqassasut, taamaalilluni Inatsisartut inatsisai il.il. attuumassutillit, taakkualu allanngortinneqarneri 2007-miilli, kingullermik taamaaqataanik nutarterisoqarmat, akuerineqartut, tassani ilaatinneqalerlutik.

2.2 Pinngitsaaliissummik akiliisitsiniarnissamut piginnaatitaanerit nutarterneqarnerat annertusitinneqarnerallu

Kalaallit Nunaanni eqqartuussisarnermik inatsimmi pinngitsaaliissummik akiliisitsiniartarneq pillugu maleruagassat maani nunatsinni akiliisitsiniartarnermut suliassaqarffimmut aammalu akiligassiissutit suut pinngitsaaliissummik akilersinniarneqarsinnaanerannut, sinaakkutissaliipput. Akiligassiissutit akileraaruseriffiup tigusartagaasa amerlanerpaartai, pinngitsaaliissummik akiliisitsiniartarneq pillugu eqqartuussisarnermik inatsimmi maleruagassani toqqaannartumik pineqartunut ilaatinneqanngillat. Taamaattumik akiligassiissutit taakkua aallaaviatigut eqqartuussiviit ikiortigalugit pinngitsaaliissummik akilersinniarneqartarput. Suliap ingerlanera taanna eqqartuussivinnut taamatullu akileraaruseriffimmut isumalluutinik aningaasartuutinillu annertuumik atuiffiusarpoq.

Taamaattumik sunniuteqarluarnerulersitsinissap ilungersuutigineqarneranut ilaatillugu siunnersuutigineqarpoq, akileraaruseriffimmut pinngitsaaliissummik akiliisitsiniarnissamut piginnaatitsineq annertusitinneqassasoq. Taamaattumik siunnersuutigineqarpoq akiligassiissutit maannakkut eqqartuussiviit akuliutsinneqarnissaannik pisariaqartitsiviusartut, taamatut akuutitsiviunngitsumik pinngitsaaliissummik akilersinniarneqarsinnaalissasut. Taamaalilluni

piginnaatitsinerit aamma sullissinernut pisortanit sullississutigineqartartunut (nunaminertamik atugassiineq, containerinik attartorneq, ininik inuussutissarsiorfiusussanik attartorneq il.il.) akiliinernut akiligassiissutinut aamma atuutsilerlugit annertusitinneqarput. Tamatuma saniatigut aningaasarsianik annertunaarlugit tunniunneqarsimasunik utertillugit akiliinissamik pisortat piunasaqaatai pineqartunut ilaatilerlugit aamma piginnaatitsinerit annertusitinneqassasut, siunnersuutigineqarpoq.

Akiligassiissutit sorliit suliassaqarfinit akisussaaffigilerlugit tiguneqarsimasuneersut, akileraaruseriffiup akiliisitsiniartartuinit eqqartuussiviit ikiortiginagit pinngitsaaliissummik akilersinniarneqarsinnaanersut, Kalaallit Nunaanni eqqartuussisarnermik inatsimmi § 598, imm. 3 malillugu Inatsisartut inatsimmi aalajangersinnaapput. Piginnaatitsissut taanna siunnersuummi § 2-mi atornerqarpoq. Taamaalilluni Kalaallit Nunaanni eqqartuussisarnermik inatsimmi allassimasut saniatigut akiligassiissutit sorliit akileraaruseriffiup akiliisitsiniartartuinit pinngitsaaliissummik akilersinniarneqarsinnaanersut, erseqqinnerusumik allassimasunik, aalajangersagaq imaqarpoq.

Siunnersuutip atuunnerani akiligassiissutaasartussat nutaat arlallit akiligassiissutinut akileraaruseriffimmit akilersinniarneqarsinnaasunut allattukkanut ilanngunneqarput. Siunnersuut akileraaruseriffiup akiliisitsiniarnermik suliagarneranut sunniuteqarluarnerulersitseqataassaaq aammalu eqqartuussivinni isumalluutit allanut atornerqarsinnaalersissinnaallugit. Siunnersuummi isumalluutininik atuiffiusumik suleriaaseqarnissaq pisariaarutsinneqassaaq, taamatullu eqqartuussivimmuut akitsuutinut aningaasartuutissanik sipaaruteqarnermik malitseqassalluni, kisianni tamanna allatigut innuttaasut inatsisitigut isumannaatsuunerannut sunniuteqarnerlussanani. Kisiannili sunniuteqarluarnerulersitsinissamut siunnersuutit inatsisitigut isumannaatsuutitsinermut pitsangorsaanaasat tunngavilersuutigineqarsinnaassaaq, taamaaliornermimi suliassani arlalinni, ullumikkumit sukkanerusumik suliassat suliarineqartalissammata.

Tamatuma saniatigut § 2, imm. 1-ip oqaasertalersugaaqqinnissaa siunnersuutigineqarpoq, taamaalilluni aalajangersagaq atuaruminarnerulissammat, taamaalisukkullu § 1, imm. 2-mi allattuiffimmut assingunerulerluni. Siunnersuutigisatut ilusiliineq aalajangersakkamik akileraartitsinermut aqutsisoqarfimmit atugaaneranik oqilisaassaaq, aammalu innuttaasunut paasiuminarnerulersitsilluni.

Tamatuma saniatigut inatsisinik aamma peqqussutinik tullerriiarineq paarlattuanik § 1, imm. 2-mi allattuiffiup ilaanut attuumassutilinnut innersuussissutitut suliarineqassasoq siunnersuutigineqarpoq, taamaalilluni aalajangersagaq naannerulersinneqassammat aamma atuaruminarnerulluni. Taamaalisukkut inatsisini taakkuni innersuussutaasuni siunissami allannguutit taamaallaat sumiiffinni arlalinni pinnagu sumiiffimmi ataasiinnarmi inatsisip oqaasertaata iluarsineratigut taamaallaat pialissapput.

2.3 Aningaasat aningaasarsianit unerartinneqartut atorlugit naatsorsuilluni akiliisarnerit assigiissaarneqarnerisa malitsigisaanik sunniutaasumik iluarsineq

Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata allangortinneqarnera pillugu Inatsisartut inatsisaanni nr. 13, 3. juni 2015-imeersumi akileraaruseriffimmit ingerlanneqartumik aningaasarsianik unerartitsinissamut naatsorsukkanik akiliinissamut killigititaq nutaaq ilanngunneqarpoq. Inatsisartut 2013-imi ukiaanerani ataatsimiinneranni (UKA2013/100) akileraarutinut A-nut aammalu iluanaarutisianit akileraarutinut naatsorsukkanik akiliinissamut piffissamut killigititap kinguartinneqarnissaata akuerineqarnera pissutigalugu allangortitsisoqarpoq.

Kisiannili allangortitsinermut inatsimmi 3. juni 2015-imeersumi, Inatsisartut inatsisaanni § 3, imm. 6-imi aningaasarsianik unerartitsinissamut naatsorsuilluni akiliinissamut § 3, imm. 1 malillugu ingerlanneqartumut aalajangersagaqareenera, sillimaffigineqarsimangilaq. Tamanna paatsiveerutsitsisinnaavoq paatsoortitsisinnaallunilu, tassami § 3, imm. 6-imi aalajangersakkami 2013 sioqqullugu naatsorsuilluni akiliinissamut killigitat malinneqarmata.

Siunnersuummi § 3, imm. 6 atorunnaarsillugu, taamatut naapertuutinngitsoqarnera iluarsinarneqarpoq. Taamaalilluni siunnersuummi taamaallaat sulisitsisut aningaasarsianik unerartitsinissaannut nalunaarutiginninnissamut naatsorsuillunilu akiliinissamut killigititaq, Inatsisartut inatsisaanni § 3 a-mi allassimasoq aammalu killigitat taakkua assingi akileraarutinut A-nut il.il. atuuttut malillugit ingerlanneqartoq, ataasiinnanngusaaq.

2.4 Ilanngaatiginnissinnaatitaanerup annertusitinneqarnera

Tamatuma saniatigut siunnersuut ilanngaatiginnissinnaatitaanerup annertusitinneqarnissaanik imaqarpoq, taamaalilluni akiligassiissutaasartut assigiinngitsut arlallit ilanngaatiginninnikkut matussuserneqarsinnaallutik. Siunnersuutaavoq aamma ilanngaatiginnissinnaatitaanermi aamma akiligassiissutinik il.il. akiliineq pineqartunut ilaatinneqalissasoq.

Akiliisitsiniartarneq isumalluutinik atuiffiungaatsiartarpoq aammalu suliap ingerlasarnera pisariulluni, akileraaruseriffimmi suliassanik sularinninnermi iliuuseqarnissarpasuit pisariaqartarlutik. Akileraaruseriffiup sakkussatut atorsinnaasaa akuttunngitsumik atorneqartartoq sunnuteqarluartorlu tassaavoq ilanngaatiginnittarneq. Illuatungeriit marluk (2-t) imminnut aningaasanik akiitsoqarfigalutik aammalu aappaata aappani nalunaarfigalugu illuatungeriit akornanni akiitsut tamakkiisumik ilaannaasumilluunniit akilerneqarneranni piumasaqaatit imminnut naligiilersut, pisoqarnerani ilanngaatiginninneq atorneqassaaq. Sakkussaq nalinginnaasumik pigisanut nalilinnut inatsisini ilaavoq aammalu ukiorpassuarni eqqartuussivimmi suleriaaserineqarluni ineriartortinneqarsimalluni. Ilanngaatiginninnissamut piumasaqaat qitiusoq tassaavoq illuatungeriit (2-t) akornanni illugiilluni inissisimaneq.

Sakkussaq ilanngaatiginnittarnermut assingusooq taaneqartartoq ilanngaatiginnissinnaalerneq, pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata atuutsinneqalernerani 1996-imi Kalaallit Nunaanni atuutsinneqalersooq, pisortat akiitsunik akilinngitsuukkanik akiliisitsiniartarnerannut taamaaqataanik sunniuteqarluartumik periaaserineqarpoq. Ilangaatiginnissinnaalernermi illuatungeriinnissamat piumasaqaat atuukkunnaarpoq, tassami alla illuatungeriit ilanngaatiginnissinnaatitaaneranni ilangussinnaalermat. Ilangaatiginnissinnaatitaanermi ilanggunnermi ilanngaatiginnissinnaalerneq taanna ullumikkut Namminersorlutik Oqartussat akileraarutininik utertoortutinnik tunniussinerannut killeqartinneqarpoq, taamatullu ilanngaatiginnissinnaatitaanermi ilanggunneq taamaallaat akiligassiisutininik erseqqinnerusumik killilerneqartuninik matussusiitinneqarsinnaammat.

Ilangaatiginnissinnaatitaanermi ilanggunneq taamaalilluni marlunnik immikkoortuninik imaqarpoq: Immikkoortoq siulleq tunniussinerit sorliit ilanngaatiginniffiusinnaasut erseqqinnerusumik killissalernerneqarnerannut tunngassuteqarpoq, immikkoortup aappaa akiligassiisutit sorliit ilanngaatiginniffiunissaannut periarfissiiviunerannut tunngassuteqarluni. Siunnersuummi immikkoortut marluusut imarisaannik atuinnissamat periarfissanik annertusititsiniartoqarpoq.

Immikkoortumut siullermut tunngatillugu, tunniussinerit immikkoortut allat ilanngutsillugit, ilanngaatiginnissinnaatitaanerup annertusitinneqarnissaa siunnersuutigineqarpoq. Taamaalilluni siunnersuutigineqarpoq, akileraarutininik utertoortutinnik tunngatillugu ilanngaatiginninnissamat periarfissat atuuttut saniatigut, pisortat akiligassiisutininik akiliinerannut atatillugu tunniussinerni ilanngaatiginnittoqarsinnaalissasoq. Akiligassiisutininik akiliisarnernut ilanngaatiginnissinnaatitaaneq annertusitinneqarpat, suliaqarnermi tamanna ilanngaatiginninnermut assingusussaavoq, kisianni illuatungeriinnissamat piumasaqaat matuma siuliani taaneqartoq atuukkunnaartoq ersarissumik allaanerussutaalluni. Taamaaliornermi pisortat akiligassaqaarfii arlallit akiitsulinnut piumasaqaatiminnut matussusiititsinissamat periarfissinneqarlutik. Tamanna assersuutigalugu tassaasinnaavoq kommunip suliffeqarfimmut kommunimut akiitsulimmut, kisianni Namminersorlutik Oqartussanit tunniussivigineqartussamat, piumasaqaatiminut matussusiititsinissamat periarfissaqarnera.

Immikkoortup aappaanut tunngatillugu aammattaaq akiligassiisutininut tunngasortaani, akiligassiisutaasartut ilanngaatiginninnikkut matussuserneqarsinnaasut allassimaffiat annertusitillugu, ilanngaatiginnissinnaatitaaneq annertusitinneqassasoq siunnersuutigineqarpoq.

Allaffissornikkut sakkussamat ilanngaatiginninnertut ilanngaatiginnissinnaalernertullu iluseqartumut taarsiullugu atorneqarsinnaasoq tassaavoq, tunniussinernit arlalinnit pisortat ingerlattagaannit (assersuutigalugu akiligassiinerit tunniussivigineqarnerat) taarsiititsilluni akiliisitsineq. Tamanna akiliisitsiniarnermi iliuuserineqartartoq isumalluutitigut oqimaatsumik ingerlanneqartarpoq, Kalaallit Nunaanni eqqartuussisarnermik inatsit tunngavigineqarluni. Taarsiititsilluni akiliisitsineq aningaasangorlugit ingerlanneqarsinnaavoq taamatullu pigisat nalillit

soorlu biilit, umiatsiat pigisallu aalaakkaasut taartigitinneqarsinnaallutik. Taarsiititsilluni akiliisitsisarneq pillugu maleruagassani piunasaqaatit arlallit naammassineqarsimasussat allassimapput. Piunasaqaatini taakkunani siunertaavoq innuttaasut inatsisitigut isumannaatsuunerannik qulakkeerinninnissaq, tassami sioqqutsisumik nalunaarutiginninnissaq piunasaqaatigineqarmat, taamatullu suut taartigitillugit akiliisitsisoqarsinnaanersoq killilersuisoqarluni. Taamaattoq pisuni aalajangersimasuni nalunaarutiginninnissaq pillugu piunasaqaat atuutsinnginneqarsinnaavoq, assersuutigalugu nalunaarutiginninnginneq eqqarsarnartoqangitsutut nalilerneqarpat imaluunniit akiitsoqartup akiitsuinut matussusiinissamut periarfissat taamaangippat annertuumik ajorseriartinneqassappata.

Tunniussinerni taarsiititsilluni akiliisitsineq sakkussaavoq, ilanngaatiginnittoqarsinnaatinnagu imaluunniit ilanngaatiginnissinnaalernermik atuinissaq periarfissaqartinnagu, akileraaruseriffimmit atorneqartartoq. Amerlanertigut tunniussinerni aalajangersimasuni taarsiititsilluni akiliisitsineq ingerlanneqarsinnaasarpoq, tassami aningaasarsianik, ikiorsiissutinik, tapersiissutinik assigisaannilluunniit tunniussinerni taarsiititsilluni akiliisitsisoqartanngimmat. Taamaattumik akiitsoqartoq aallaaviatigut annikitsumik angerlarsimaffimmini attassisinnaanissamut aningaasassaqartinneqartarpoq, tassami taamaangippat akileraaruseriffik tunniussinerup ilaanik taarsiititsilluni akiliisitsivigineqarsinnasumik killiliissammat (Kalaallit Nunaannut eqqartuussisarnermut inatsimmi § 618-imi pisariaqartitanik atugassaqartinneqarnissaq). Siuliani nalunaarutiginninneq aamma atorneqanngissinnaassaaq, tassami taarsiititsilluni akiliisitsineq amerlanertigut tamanna eqqarsarnartoqartanngimmat imaluunniit akiitsut taamaangippat matussuserneqarsinnaanngissinnaallutik.

Taarsiititsinerup ingerlanneqarnerani ataasiakkaatigut atortoqarani suliassamik suliarinninnissaq pisariaqarpoq, tamatumani ilanngaatiginninnissamut ilanngaatiginnissinnaalernissamullu sanilliullugu, taarsiititsilluni akiliisitsinissaq allaffissornikkut oqimaatsumik sakkussanngortarluni. Taamaakkaluartoq pisortat akiligassiinermik piunasaqaat tunngavigalugu tunniussinerini taarsiititsilluni akiliisitsinissaq periarfissaqartussaammat, taamaattumik ilanngaatiginnissinnaatitaanerup tunniussinerit taakkorpiaat ilaaterlugit annertusitinnissaa eqqarsarnartoqartussaangilaq.

2018-imiilli kommunit aamma Namminersorlutik Oqartussat periaaseq Prisme atuutsilerpaat, taamaalillutik immikkoortortat tamarmik pisortat ataatsimoorlutik aningaasaqarnermi periaaseq ataaseq maannakkut atorlugu. Tamatuma kingunerisaanik tunniussinerit kommuninit imaluunniit Namminersorlutik Oqartussanit ingerlanneqartut, ingerlaannartumik suliap ingerlanerani akileraaruseriffimmi akiitsunut akilinngitsuukkanut periaatsimut atassuserneqarsinnaapput. Ingerlaannartumik suliap ingerlanera taanna akileraaruseriffimmi isumalluutinik pitsaanerulersitsissaaq, tassami sulisut atortoqarani suleriaaseqarnermiittut akiliisitsiniarnermik suliassanik suliarinnissinnaalersinneqarsinnaammata.

Siunnersuut, akileraaruseriffiup sulineranik sunniuteqarluarnerulersitsinissaq pisariinnerulersitsinissarlu pillugit Naalakkersuisut ungasissumut siunnerfeqarneranni ilaavoq. Kommunit aamma Namminersorlutik Oqartussat ilanngaaticinnissinnaatitaanerisa annertusitinneqarnerani, akileraaruseriffimmi atortoqarani suliassanik sularinninnermi iliussissanut isumalluutitik atuineq annikillisinneqassaaq, tassani suliat ingerlaneri annertunerujussuarmik ingerlaannartunngortinneqarsinnaalissammata.

2.5 Akiligassiissutip annertussusaanut annikinnerpaaffissatut killissaliussap inatsimmi aalajangersarneqarnera

Tamatuma saniatigut siunnersuut annikinnerpaaffissatut killissaliussamik aammalu akiligassiissutit sinneruttut annikitsut isumakkeernissaannut killissamik, 2021-miilli aningaasanut inatsisini oqaasertaliussatut atuussimasumik, ilanngussinermik imaqarpoq. Siunnersuutigineqarpoq oqaasertaliussat taakkua najoqqutassami inatsimmi ilanngunneqassasut, taamaalillutik taakkua siunissami aningaasanut inatsimmi ilaatinneqanngissinnaalissallutik.

2020-mut ilassutitut aningaasaliissutinut inatsimmi oqaasertaliussaq, 100 koruunit inorlugit akiligassiissutinik tigusaqartannginnissamut Naalakkersuisunut piginnaatitsiviusoq, ilanngunneqassasoq, Aningaasaqarnermut Akileraartarnermullu Ataatsimiititaliap akueraa, taamatullu Namminersorlutik Oqartussat akiligassiissutaasa 300 koruunit inorlugit annertussuseqartut tamarmik taamaatinneqarnissaannut Naalakkersuisut piginnaatinneqarlutik.

Aalajangiineq taanna taamanikkulli atuussimavoq, tassami ukiumoortumik aningaasanut inatsisini suliassaqarfimmut 20-24-mut oqaasertaliussani piginnaatitsissuteqarnek sivitsorneqartarmat.

Siunnersuutigineqarpoq annikinnerpaaffissanut killiliussaq aamma taamaatitsinissamut killiliussaq pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni ilanngunneqassasut, taamaaliornermi ukiumoortumik aningaasanut inatsisinut attuumassuteqarunnaarsinneqassallutik.

Taamaalilluni siunnersuummi inatsisitigut inissisimaneq atuuttoq inatsimmut aalajangersimasumut nuutinneqarpoq.

Isumakkeerinissamut killissatut siunnersuutigisaaq aqutsinernut, aamma isumalluutitik sipaagaqarnernut iluaqutaassaaq. Akiitsullit aningaasaqarnikkut il.il. atugarisai apeqqutaatinnagit akiliutissanik 100 kr.-nik ikinnernilluunniit isumakkeerinissamut pisariunngitsumik atuutsitsilernissamut piginnaasaqarnissaq pineqarpoq. Siunnersuutip akiitsullit atugarisaannik nalilersuinerit kingornatigut isumakkeerinissaq pillugu malittarisassat atuutereertut siunnersuutip ilapittorpai. Malittarisassanut taama ittunut Akileraaruserinermik ingerlatsineq pillugu Inatsisartut inatsisaanni §§ 53-57 assersuutaapput, tamatuma kingornatigut inunnik ataasiakkaanik nalilersuinerinik tunngaveqarluni isumakkeerisoqarsinnaasarluni. Piginnaatitsinissamut

siunnersuutigisaq pisortani oqartussaasoqarfiit, taakku akiitsullit aningaasaqarnermi atugarisaannik il.il. ilisimasaqarnerminnik aallaaveqarlutik aamma akiligassanut 100 kr.-t sinnerlugit annertunerusunut akileeqqusinermik ingerlataminnik pingaarnersiuiussaannut killiliingilaq.

Taamaalilluni akiligassiissummit akiligassiissummut ataasiakkaatigut isumalluutitigullu oqimaatumik suliarinnittoqarani, akiligassiissutinik annikitsunik isumakkeerinnissamut assigiiaartumik pisariitsumillu inatsimmi tunngavissaqarnissaq, aalajangersakkami qulakkeerneqassaaq.

Kisiannili taamaatitsinissamut killissamut tunngatillugu siunnersuutigineqarpoq, taanna annertusititami ilanngunneqassasoq, tassami kommunit aamma Namminersorlutik Oqartussat nammineerlutik akiligassiissutitik 100 koruuninik annikinnerusunilluunniit annertussusilimmik akiitsut sinneqartut taamaatissinnaanerannut periarfissinneqarmata. Taamaaliornermi maannamut taamaatitsinissamut periarfissaasoq, aamma kommunit pineqartunut ilaaterlugit, annertusitinneqarpoq.

Tamatuma saniatigut kommunit akileeqqusissutaannut qaammatsiutini ulluni 14-ini piffissamik akiliuteqarfiunngitsumik ilanngussisoqassasoq siunnersuutaavoq. Tamatumunnga siunertaq tassaavoq kommunimit ataatsimit akileraartitsisoqarfimmut akileeqqusissutitut nassiussamik paarlaassisutut akiliutit kinguartoorsimasut pinerinik killersuinissaq. Taamaalilluni akileeqqusissutinut akiliutaasimasunut akileraartitsisoqarfiup akiliisitsiniarnissaanut aarleqqutaasoq killilerneqarpoq.

2.6 Akiliisitsiniartarnermut suliassaqarfimmi attaveqatigiinnermi atsiornissamut piunasaqaat
Sunniuteqarluarnerulersitsinissap anguniarneqarneranut ilaatillugu siunnersuut tamatuma saniatigut Naalakkersuisut akiliisitsiniartarnermut suliassaqarfimmi atsiornertaqannngitsumik, atsiorneq maskiinamik issuarneqarsimasoq assigisaaluunniit atorlugu allakkianik atuutilersitsinissamut maleruagassanik aalajangersaanissamut piginnaatinneqarnerannik imaqarpoq.

Akilaraaruseriffik ullut tamaasa allakkanik allakkianillu amerlasoorpassuarnik nassiussuisarpoq. Allakkat taakkua ilai amerlasuut ingerlaannartumik sulianik ingerlatitsisarnerni, IT-programminit, akilaraaruseriffimmi isumalluutit sunniuteqarluarnerulersinnissaannut pitsaanerulersinnissaannullu, ikkussorneqarsimasunit, ingerlanneqartartuni, ilaatillugu nassiunneqartarput. Taamaalilluni allakkat akilaraaruseriffimmit nassiunneqartut tamakkernagit inummit allanneqarsimasarput. Kisianni allagarpassuit akilaraaruseriffimmi IT atorlugu periaatsinit ingerlaannartumik pilersitaasarput. Siunnersuummi piginnaatitsissutip, akilaraarutinut suliassaqarfimmi pisartut assigalugit (akilaraaruserinermik ingerlatsineq pillugu Inatsisartut inatsisaanni § 56) akiliisitsiniartarnermut

suliassa qarfiup iluani allakkat atsiorneqarsimanissaannut piunasaqaammit ingerlaannartumik pilersinneqartut ilaatinnginnissaannut, atorneqarnissaa eqqarsaatigineqarpoq.

Siuliani pineqartut akiliisitsiniartarnermut suliassa qarfimmi, suliassa qarfiup ataatsimoortinneqarneraniilli annertuumik digitalinngorsaaffiusimasumi, pingaartumik atuuppoq. Digitalinngorsaaneq taanna Naalackersuisut pisortat ingerlatsinerannik nutarterinissamik kissaateqarnerannut naapertuuppoq, peqatigisaanillu akileraaruseriffimmi isumalluutit suliassanut iluaqusiinerpaasussanut atorneqarnissaat qulakkeerneqassalluni. Akileraaruseriffiup nutarteriffigineqarnerani aamma digitalinngortitsivigineqarnerani akiliisitsiniartarnermut suliassa qarfimmi suliat ingerlasarneri arlalippassuit ingerlaannartunngortinneqarput. Tassani suliat ingerlaneri, aammalu annertunerpaatigut inuk atilik akuutinnagu ataasiakkaatigut isummerfigineqartariaqanngitsut, siusinnerusukkut atortoqarani aammalu isumalluutinik annertuumik atuilluni isumagineqartarput. Suliat ingerlasarnerini taakkunani amerlasuuni ilanngaatiginninnissamut allakkatut, akiliinissamik eqqaasitsinertut, suliami pineqartumut tusarniaanertut assigisaattullu ingerlanneqartarneri ilaatinneqarput. Ineriartorneq taanna inuiaqatigiinni kalaallini sumiiffinni allani, aammalu nunani allani sanilliuttakkatsinni annertooujussuarmik takuneqartartoq, ukiorpassuarni suli ingerlaannartussaavoq.

Oqartussat suleriaasiinik ingerlaannartunngortitsisarnerup annertusiartornera taamaalilluni pisortat ingerlatsineranni nutaaliaasumi ilaalluinnarpoq, tassani pisortat isumalluutaat tamatumunnga taarsiullugu suliassanut ingerlaannartunngortinneqarnissamut naleqqutinngitsunut atorneqarsinnaalissallutik.

Inatsisissatut siunnersuummi sunniuteqarluarnerulersitsinissamut tassunga iluaqusiiniartoqarpoq, tassami allakkiani ingerlaannartunngortinneqarsinnaasuni atsiornissamut piunasaqaatip peerneqarnerani akileraaruseriffimmi isumalluutit allanut atorneqarsinnaalissammata. Isumalluutit siunissami innuttaasunik ilitersuussinermut atorneqarsinnaassapput.

Inatsisitigut isumannaatsuutitsinissap, atsiornissaq pillugu piunasaqaammut tunngavigineqartup, mianerineqarnissaanik ajorseriartitsinermik siunnersuut kinguneqassanngitsoq naliliutaavoq. Mianerisassat taakkua ilaatigut tassaapput, allakkat suminngaanneerfiat inummut akisussaasumut tutsinneqarsinnaassasoq, ilaatigut suliaq sulisumit suliambut attuumassuteqarpallaanngitsumit sularineqarsimassanersoq takunissaanut innuttaasoq periarfissaqassasoq, ilaatigullu oqartussat sulinermi akisussaaffimmik inissiisinnaassasut. Naggataatigut atsiorneq missingiutip aammalu allakkat inaarutaasut assigiinngissutaattut isigineqartarpoq.

Allakkat ingerlaannartumik pilersinneqartut suliassanik sularinnittartup sunniuteqarfiginngisaanik pilersinneqartarput, taamaattumik suliambut attuumassuteqarpallaarnerup aammalu sulinermi akisussaasuusup mianerineqarnissaa, allakkat inummit allanneqarsimasuuppata siunertarineqartartut

assinginik siunertaqaratik. Taamaaqataanik allakkat ingerlaannartumik pilersinneqartut missingiutitut ilusilerlugit nassiunneqarnaviangillat.

Qanoq pisoqaraluarpalluunniit oqartussaq atuutsitsilersoq allakkanut nassiussorneqartussanut ingerlaannartumik allagannngortinneqartunut akisussaasuusaaq. Tamatuma saniatigut allakkat taakkua ilitersuissutaasunik allannertaqassapput aammalu attaveqarfissanut paasissutissanik imaqassallutik, tiguisussap ilitersuisussarsiffigisinnaasaannik.

2.7. Aningaasarsianit unerartitsinerup ingerlaavartunngortinneqarnera

Pisortat ingerlatsineranni ingerlaavartunngortitsinissamik aammalu IT-nik tapersiinissamik ilungersuuteqarnermut matuma siuliani taaneqartumut nangissutigalugu siunnersuutigineqarpoq, akileraaruseriffiup aningaasarsianit unerartitsineq pillugu suliassanik suliarinnittarneranut erseqqinnerusumik maleruagassiisumik nalunaarummik atuutsitsilernissamut Naalackersuisut inatsimmi tunngavissinneqassasut.

Nalunaarummi tassani siunertaavoq, ingerlaavartunngortitamik aningaasarsianit unerartitsinermi akileraaruseriffiup missingersuineramik ingerlatsinissaanut killissanik aalajangersaanissaq. Taamaalilluni eqqarsaataavoq, isertitat annertusiartortinnerannut, akileraaruseriffiup aningaasarsianit unerartitassanut procentiliussassaannut aallaaviusinnaasumik, nalunaarutitut ilusilimmik aalajangersaanissaq. Isertitat annertusiartortinneranni tassani alloriarnerit tamarnik taamaalillutik isertitanut annertussusissaassapput, aalajangersimasumik aningaasarsianit unerartitsinermi procentiliiffigineqarsinnaasussat.

Aningaasarsianit unerartitsineq akiliisitsiniarnermi akuliunnerusussaavoq, akileraaruseriffimmi taamaaqataanik isumalluuterpassuarnik atuiffigineqartariaqartussaalluni. Innuttaasut inatsisitigut isumannaatsuunerat annikillisinngu, akileraaruseriffimmi suliassanik suliarinnittartuni isumalluutininik pisariaqartitsineq siunnersuummi annikillisinneqarpoq.

Nalunaarummi malittaasumi akileraaruseriffiup aningaasarsianit unerartitsinermi suliassanik suliarinninneranut sinaakktissinikkut, suliassanik suliarinninnerup annertunersaa ingerlaannartunngortinneqarsinnaalerlugu, tamanna pissaaq. Sinaakktissani taakkunani innuttaasut qanoq naatsorsuuteqarsinnaanerit ersarissumik takuneqarsinnaalissaaq, ilanngullugu qaqugukkut akiitsullit aningaasarsianit unerartitsivigineqarsinnaanersut imaluunniit unerartitsivigineqarsinnaannginnerisut.

Aalajangersagaq suliakkiissuteqarnertut ilusilersorneqassaaq, tassami IT atorlugu tapersiinissaq pisariaqartoq suli inerisarneqarsimanngimmat, aningaasarsianit unerartitsinerup suliarineqarnissaata ingerlaavartunngortinneqarnissaanut maleruagassat suut pisariaqartinneqarnerisut, siunnersuutip saqqummiunneqarnerata nalaani suli nalorninarmat. Tamatuma saniatigut tamatumunnga pisariaqartitsisoqalissagaluarpat, nalunaarutip iluarsinissaa eqaannerusussaavoq, taamatullu

ataatsimut isigalugu aningaasarsiat akillu ineriartornissaat eqqarsaatigalugu, inatsimmi isertitat annertusiartuaartinnerannut aalajangersaanissaq pisariaqanngitsumik eqarpallaassalluni.

Siunnersuummit innuttaasut inatsisitigut isumannaatsuunerat ajorseriartinneqassanngitsoq naliliisoqarpoq, tassami akileraaruseriffiup aningaasarsianit ilanngaatiginninnermut procentiliussanut suleriaasiata paasiuminarneruneranik siunnersuut malitseqartussaammat. Peqatigisaanik akiliisitsiniarnermut akerliliissuteqarnissamut innuttaasut periarfissaqarnerat allangortinneqassanngilaq, taamatullu akileraaruseriffik pisariaqartitsinermik naliliinermi suli killilersorneqartussaalluni.

2.8 Namminersorlutik Oqartussanut ikaarsaernerup kingorna inatsisip oqaasertaannik nutarterineq

Siunnersuut tamatuma saniatigut pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaata teknikkikkut iluarsineqarnerinik arlalinnik imaqarpoq. Namminersornerullutik Oqartussaniit Namminersorlutik Oqartussanut ikaarsaernerup kingorna sullissiviit oqartussallu arlallit taaguutaat allanngorput. Kisiannili tamanna pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni allanngortinneqanngilaq, tamannalu matumani siunnersuummi iluarsineqarpoq.

2.9 Inatsisitigut pisinnaatitaasunut pineqaatissiinissamut aalajangersakkat nutarterneqarnerat

Siunnersuut Inatsisartut inatsisaanni inatsisitigut pisinnaatitaasunut pineqaatissiisarnermut aalajangersakkat nutarterneqarput, taamaalilluni tassani malittarisassat atuuttut naammassineqarlutik. Taamaalilluni teknikkikkut oqaasertaliinermi allanngortitsineq, suleriaatsimik allanngortitsiviunngitsoq, kisimi pineqarpoq.

2.10 Akiliutissanut ikittunut akitsuutit pillugit aningaasanik ingerlatsiviusartunik

isumaqatigiissutinik atsiuinissamut piginnaatitaaffigisap atorunnaarsinnera

Akileeqqusarineqartunut akiligassanut akileraartitsisarfirmut akiliutissanut ikittunut akiliinermut akitsuusersuineranut tunngatillugu piginnaatitaaffeqarnermut malittarisassap atorunnaarsinnera siunnersuummi aamma ilaavoq. Malittarisassap 2007-imi atugaalersinneqartup assorsuaq piviusuni aqunniarnerata ajornakusoortupilussuuneranik paasisaqarfigineqarsimavoq, taamaattumillu piginnaatitsissutaasoq atorneqarsimanani.

Tamatuma kingornatigut niuffaffimmi akiliisarnermut iluarsiissutinik arlalinnik, akeqanngikkunik atugaanissaat akikitsuaraasunik takkuttoqarsimavoq. Internetimut pitsanngoriartuaaginnartumik aqquteqarnerup innuttaasunut aamma suliffeqarfinnut suli amerliartuinnartunut netbankikkut akiliuteqarnerit siammarternissaat periarfississimavai, taamaalillunilu allakkerisarfik aqqusaaqqaarnagu akiliutinik isumaginninnissamut periarfissiisimapput.

3. Pisortanut aningaasaqarnikkut allaffissornikkullu sunniutaasussat

Naliliutaavoq siunnersuut nalinginnaasumik pisortanut akiitsunik akilinngitsuukkanik annikillisitseqataassasoq, tamannalu peqatigisaanik kommunit aamma Namminersorlutik Oqartussat akiliisinnaassuseqarnerannik pitsanngorsaassasoq. Akileraaruseriffiup akiliisitsiniarnissamut piginnaatinneqarnerannik annertusititsineq aammalu ilanngaatiginnissinnaatitaanerup annertusitinneqarnera, akileraaruseriffiup akiliisitsiniarnermik suliaqarnerata ingerlaneranut atatillugu allaffissornermik oqilisaassapput. Taamaaqataanik atsiornissamut piumasaqaatip ilaatinneqannginnera akileraaruseriffiup sulinerannik sunniuteqarluarnerulersitsissaaq. Kisiannili suliniutini taakkunani aningaasaqarnikkut iluanaarutissat aalajangersimasut naatsorsorneqarsinnaanngillat. Tamatumunnga taarsiullugu iluanaarutissat pisortanut akiitsunik akilinngitsuukkanik sunniuteqarluarnerusumik akiliisitsiniartarnertut ilusilimmi atuutsinneqalissapput.

Siunnersuut akiliisitsiniarnermik suliaqarnerup tunngavissinnissaanut akileraaruseriffimmi IT atorlugu periaatsinik atuutereersunik iluarsinissamut ineriartortitsinissamullu aningaasartuuteqarnermik malitseqassasoq missiliuutigineqarpoq. Tamatumunnga ineriartortitsinermut aningaasartuutit 1 million kr.-t tungaannut annertussuseqassasut missiliuutigineqarpoq, tamannalu nammineq aningaasaliissutitigut killissat iluaniitinneqarsinnaavoq.

Inatsisini atuuttuni piumasaqaatigineqarpoq akiliisitsiniarnermi eqqartuussiviit annertunerusumik akuutinneqartassasut. Tamatuma malitsigisaanik eqqartuussivinni isumalluutit, suliassanik suliarinninnermi piffissaq sivisuujusarluni suliassaqarpallaareersut, annertuumik atorneqalertussaapput. Taamaattumik pisortanut akiitsunik akiliisitsiniarnermut suliassanik suliarinninnermi piffissaq atorneqartoq, siunnersuutip atuutilernerani sivikillisinneqarsinnaassaaq. Kisiannili allannguutit taakku aningaasaqarnikkut sunniutissai missiliorneqarsinnaanngillat, tassami tamanna annertuumik nalorninartortaqqamat.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut killilimmik aningaasaqarnikkut sunniuteqassasoq naatsorsuutigineqarpoq, tassami sunniuteqarluarnerulersitsinerit aamma akiliisitsiniarnissamut piginnaatitsinerit annertusitinneqarnissaat siunnersuutigineqartut, akiitsulinnut tamanut akileraaruseriffiup akiliisitsiniarnermik suliaqarneranut sunniisussaammata.

Ilanngaatiginnissinnaatitaanerup annertusitinneqarnera aalajangersimasumik annertussusilimmik inuussutissarsiortunut sunniissasoq naliliisoqarpoq, tassami taamaaliornermi ilaatigut inuussutissarsiortunermut suliffeqarfinnut akiligassiisutininik akiliutissanik tunniussinnermi pisortat ilanngaatiginnissamut periarfissaat annertusisinnaammata. Kisiannili naliliisoqarpoq inuussutissarsiortut siunnersuutip malitsigisaanik annertuumik allanngortoqarnerannik

malugisaqassanngitsut, tassami siunissami ilanngaatiginniffiullutik pisartussat, ullumikkut pisortanit tunniussinerni akiliussigallarnertut pisarmata.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut imaluunniit pinngortitamut sunniuteqassanngilaq. Siunnersuut aamma innuttaasut peqqissusaannut tunngatillugu sunniuteqassanngilaq.

6. Innuttaasunut sunniutaasussat

Siunnersuummi pisortanut allaffissornikkut nammagassat oqilisinneqarnissaat naatsorsuutigineqarpoq. Tamanna innuttaasut pisortanut akiitsuinik nammineq kajumissutsiminnik imaluunniit pinngitsaalliissummik akiliisitsiniarnissaq siunertaralugu akileraaruseriffimmiit attavigineqarlutik nalaataqartartut amerlanerulernerannik tamatuma kinguneqarnissaa naatsorsuutigineqarluni.

Innuttaasunut tamatuma aningaasaqarnikkut sunniuteqarnissaata missiliornissaa annertuunik nalorninartortaqarpoq. Taamaalilluni natsorsuutigineqartariaqarpoq akiliisitsiniarluni suliaqarnerit annertusitinneqarnerat, innuttaasut tigorianaannik akiliisinnaassuseqarnerannut artorsartitsinermik malitseqassasoq. Paarlattuanik pisortanut akiitsut sukkanerusumik akilersorneqarneranni innuttaasut ernianut aningaasartuutissaat annikillisinneqassasut, taamaalillunilu innuttaasut aningaasartuutigisartagaannik annikillisisinissaq, naatsorsuutigineqartariaqarpoq.

7. Sunniutaasussat annertuut allat

Siunnersuut allanik sunniuteqassanganneqanngilaq.

8. Oqartussanut kattuffinnullu il.il. tusarniaaneq

Siunnersuut siusinnerusukkut piffissami 15. aprilimit 14. maj 2024-mut soqutigisaqartuni makkunani tusarniaassutigineqarpoq. 2025-mi upernaakkut Inatsisartunut qinersereermermi inatsisissamat siunnersuutip suliarineqarnera aallarteqqinneqarpoq. Siunnersuut manna siusinnerusukkut tusarniaanermut akissuteqaatit iluatsillugit iluarsinernik imaqarpoq, ilanngullugit pisariaqartitsineq immikkut ukkatarineqassalluni.

Siunnersuut ulloq xx. xxx aallarnerfigalugu xx. xxx 2025 tikillugu soqutiginnittunut makkununga nutaamik tamanut ammasumik tusarniaassutigineqarpoq:

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Nunatsinni Advokatit, SIK, Sulisitsisut, BDO, Grønlands Revisionskontor, Deloitte, EY, GrønlandsBanken, BankNordik, ASG, IMAK, AK.

Siunnersuut tamatuma saniatigut piffissami matuma siuliani taaneqartumi tusarniaavimmi pissarsiarineqarsinnaasimavoq.

Tusarniaanermut akissutini tiguneqartuni immikkoortut pingaarnerit ilanngussat 2-mi matuma kingulianiittumi eqqartorneqarput oqaaseqarfigineqarlutillu.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Siunnersuutigineqarpoq inatsisip qulequtaa, pisortanut akiitsunik akilinngitsuukkanik akiliisitsiniartarnek pillugu Inatsisartut inatsisaannut, allanngortinneqassasoq. Taamaattumik inatsit siunissami Inatsisartut inatsiserissavaat. Tamatuma saniatigut siunnersuutigineqarpoq pinaveersaartitsineq qulequtaata allannerani ilaajunnaarsinneqassasoq.

Nr. 2-mut

§ 1, imm. 1

Siunnersuutigineqarpoq, inatsimmi oqartussat taaguutaat Namminersorlutik Oqartussat atuutsinneqalernerisa kingorna atorineqartunik nutarterneqassasut. Tamatuma saniatigut aalajangersagaq nutarterneqarpoq, taamaalilluni inatsisilioriaatsinut malittarisassat suleriaatsillu nutaanerpaat tassani malinneqarlutik.

§ 1, imm. 2

Siunnersuutigineqarpoq, aalajangersagaq atuuttoq nutarterneqassasoq, taamaalillutik ataasiakkaatigut inatsisinut innersuussinerit inatsisinut atuuttunut tunngatillugu eqqortumik takutitsillutik.

Tamatuma saniatigut siunnersuutigineqarpoq, allattorsimasunut inatsisit nutaat arlallit ilanngunneqassasut, arlallit kingullermik 2007-imi aalajangersakkap iluarsineqarnerata kingorna akuerineqarsimallutik. Inatsisit taakkua akileraaruseriffiup akiliisitsiniarnissamut periarfissaannik pitsaangorsaaniarluni ilanngunneqarput.

Siunnersuummi allattukkat iluarsineqartut makkuninnga allannguutinik ilassutaasunillu imaqarput:

Allanngortinneqanngitsut:	Nr. 1 – 7, 10, 11, 15, 22
Allattukkani inatsisit nutaat:	Nr. 9, 12, 19, 26 – 42, 44, 45-51
Inatsit taamaaqataa nutaaq, normua taamaaginnarluni:	Nr. 8, 13, 14, 16, 20, 21, 23-25
Inatsit taamaaqataa nutaaq, nutaamik normoqarluni:	Nr. 18→17-imut
Atorunnaarsinneqartut, taamaattumillu allattuiffimmit peerneqartut:	Nr. 9, 12, 19 (normutoqqat)
Inatsit taanna, nutaamik normulik: 21→43-mut	Nr. 17→18-imut, aamma

§ 1, imm. 3

Siunnersuutigineqarpoq, inatsimmi oqartussanut taaguutit Namminersorlutik Oqartussat atuutsinneqalernerisa kingorna atorineqartunik nutarterneqassasut.

Tamatuma saniatigut oqaasertai iluarsineqarput, tassami paaqqinnittarfinni, eqqaavilerinermi pujoorfinnillu paaviaanermi akiligassiissutinut taaguutit allassimajunnaarmata. Akiligassiissutit taakkua inatsisit siunnersuummi nr. 2-miittut allattorsimaffiisa nutarterneqarneranni allassimammata. Siunnersuutigineqartoq, akileraaruseriffiup akiliisitsiniarnissamut, maannamut oqaasertaliinermi periarfissiissutigineqartutut, taamaaqataanik suli piginnaatitaanerata, qulakkeersinnaanissaanut naammattumik ersarissutut isigineqarpoq. Taamaalilluni taamaallaat sunniutaasumik iluarsineq, suliaqarnermi pingaaruteqanngitsutut nalilerneqartoq, tassani pineqarpoq.

Nr. 3-mut

§ 2-mut inatsimmi § 1, imm. 2-mut innersuussissutip ilanngunnissaa siunnersuutigineqarpoq. Taamaalilluni innersuussinermi suleriaaseq atuuttoq aammalu akiligassiissutit ullumikkut akileraaruseriffimmit pinngitsaaliissummik akilersinniarneqarsinnaasut, ingerlateqqinneqarput. Akiligassiissutit Inatsisartut inatsisaannit aamma Inatsisartut peqqussutaannit allanit 27-neersut § 2-mi ilanngutsinneqarneranni, akileraaruseriffiup pinngitsaaliissummik akiliisitsiniarnissamut piginnaatitaanerisa annertusitinneqarnerinut peqatigitillugu tamanna pivoq.

Inatsisit akiligassiissutit siunnersuummi ilanngunneqanngiffii, Kalaallit Nunaanni eqqartuussisarnermik inatsimmi § 598, imm. 2-mi allassimapput. Tassani taamaalilluni allassimapput pigisami aalaakkaasumi qularnaveeqqusiilluni pisortat taarsigassarsiarititaasa utertillugit akilerneqarnissaannik piumasaaqatit, ineqarnermut akiliummik, kiassarnermut, innaallagissamut, imermut eqqaavilerinermullu akiliinissamik pisortat piumasaaqataat kiisalu akileraarutinut akitsuutinullu piumasaaqatit. Akiligassiissutit taakkua pillugit suleriaaseq taamaalilluni allannguuteqarani ingerlaannarpoq. Tassunga tunngatillugu maluginiarneqarsinnaavoq, taarsiivigineqarnissamik piumasaaqatit assigisaalluunniit Kalaallit Nunaanni eqqartuussisarnermik inatsimmi § 598, imm. 1-imeersut, assersuutigalugu attartortitsinermut atatillugu pissutsinut tunngassuteqartut, akileraaruseriffiup pinngitsaaliissummik akiliisitsiniarnissamut piginnaatitaanerata avataaniimmata.

Akiligassiissutaasartut, akileraaruseriffimmit akilersinniarneqarsinnaasut, annertusitinnissaat siunnersuutigineqartoq, akiligassiissutinik, akileraaruseriffimmi akilersinniarneqartussanngorlugit nassiunneqartunik, uppernarsaatinik qulakkeerinninnissaq pillugu isumaliutersuuteqarnissamut ammaavoq. Kisiannili piumasaaqatit akileraaruseriffimmi akilersinniarneqartussanngorlugit nassiunneqarsinnaanissaanut, akiligassiisumiit piumasaaqatip nassiunneqannginnerani isumaqatigiinngissinnaanerit paasinarsisinneqareersimanissaat, tunngavissaatinneqarpoq. Taamaalilluni pisortat akiligassiissutaannik eqqortumik sunniuteqarluartumillu akiliisitsiniaanissamut, tamatumunnga tunngavigineqartut nalornissutigineqannginnissaat, ersarilluinnartumik tunngavissaatinneqarpoq, tamatumalu akiligassiissutip nassiunneqannginnerani qulakkeernissaa akiligassiisup akisussaaffigaa. Taamaakkaluartoq akiitsoqartoq akileraaruseriffiup

akiliisitsiniarneranut atatillugu piumasaqaammi isumaqataasimanngippat, akiitsoqartoq aamma tamatumunnga akileraaruseriffimmut akerliliissuteqarsinnaasussaavoq. Taamatut pisoqartillugu aallaaviatigut suliaasaq Kalaallit Nunaanni eqqartuussisarnermik inatsimmi § 609, imm. 1-imi maleruagassat malillugit eqqartuussivimmu suliaakkiissutigineqartussaassaaq.

Akiligassiissutaasartut siunnersuummi ilanngunneqartut amerlasoorujussuuneranni, sulisunik isumalluutininik aammalu eqqartuussivimmi suliaasanut eqqartuussivimmullu akitsuutininik aningaasartuutininik atuisoqartariaqarani, akileraaruseriffiup akiliisitsiniarnissamut periarfissaannik sunniuteqarluarnerulersitsinissap pitsanngorsaannissallu kissaatigineqarnerani tassani pineqarpoq.

Naggataatigut siunnersuutigineqarpoq akiligassiissutaasartut allat pingasut nutaat § 2, imm. 1-imut ilanngunneqassasut. Piumasaqaat ataaseq tassaavoq aningaasarsianik annertunaarlugit tunniunneqarsimasunik utertillugit akiliinissamut piumasaqaat (nr. 3), aappaa tassaavoq qatserinermut atortunik tunisinermit akiliutinik pisortat piumasaqaataat (nr. 4) aammalu pingajuat tassaavoq ininik inuussutissarsiorfiusussanik attartornermit pisortat piumasaqaataat (nr. 5). Piumasaqaatit taakkua inatsimmi tunngavissaligaanngillat, taamaattumik piumasaqaatit inatsimmi § 1, imm. 2-mi ilanngunneqarsinnaanatik.

Akiligassiissutaasartut nr. 3-mi, 4-mi aamma 5-imi siunnersuutigineqartuni allassimasut, ullumikkut eqqartuussiviit aqutugalugit akilersinniarneqarnissaat pisariaqarpoq, tamannalu annertuunik aningaasartuuteqarfiusarpoq isumalluutinillu atuiffiusarluni. Siunnersuummi akiligassiissutaasartunut taakkununnga immikkut killiligaasunut toqqaannartumik akiliisitsiniarnissamut inatsimmi tunngavissaq ilanngunneqarpoq.

§ 2, nr. 3 pillugu erseqqinnerusumik – aningaasarsianik annertunaarlugit tunniussineq (condictio indebiti)

Oqaasertaliinissamut siunnersuutigineqartoq matumani ima paasineqassaaq, piumasaqaatit kukkunikkut pisortani sulisitsisup sulisumut aningaasarsianut annertunaarlugit tunniussinerani pilersimasut, tamatumalu kingorna akileraaruseriffik aqutugalugu piumasaqaatip akilersinniarneqarnissaa. § 2-mut ilanngussinermi, tamatuma kingorna eqqartuussiviit akuliutsinnagit piumasaqaatit akileraaruseriffimmi pinngitsaaliissummik akiliisitsiniarnissamut piareersimassapput.

Oqaatigineqassaaq, aningaasarsianik annertunaarlugit tunniunneqarsimasunik utertillugit akiliinissaq pillugu piumasaqaammut atatillugu akiligassiisup aamma akiitsoqartup akornanni isumaqatigiinngitsoqarsimasinnaasoq. Condictio indebitimut tunngatillugu periutsimik atuuttumik allannortitsiniarnermik siunnersuut anguniagaqanngitsoq tassunga tunngasutut oqaatigineqassaaq. Taamaalilluni aningaasarsiat amerlavallaartillugit akiliutinik pissarsisimanerminik aningaasarsiallip

ilisimasimassappagu, imaluunniit ilisimasariaqassagaluarpagu utertillugit akiliutigineqartarnissaat paatsuugassaangilluinnartumik sulii aallaavigineqassaaq.

Tamakku saniatigut akiligassiissutit akileraaruseriffimmi akilersinniarneqartussanngorlugit nassiuunneqartut uppersaataannik qulakkeerinnittarneq pillugu immikkoortoq matuma siulianiittoq kiisalu akiitsoqartup akileraaruseriffimmut akerriliissuteqarsinnaanera aammalu suliamik eqqartuussivimmut suliaakkiissuteqarsinnaanera, innersuussutigineqarput, takuuk Kalaallit Nunaannut eqqartuussisarnermut inatsimmi § 609, imm. 1.

§ 2, nr. 4 pillugu erseqqinnerusumik – qatserinermut atortut

Oqaasertaliinissamut siunnersuutigineqartoq matumani paasineqassaaq, piunasaqaatit kommunit imaluunniit Namminersorlutik Oqartussat qatserinermi atortunik tunisineranni pilersartut, ilanngullugit qapummik qatserutit, uliit qatserutit, slangenut ikkuffissat assigisaallu.

§ 2, nr. 5 pillugu erseqqinnerusumik – init illut initaannit allaanerusut (init inuussutissarsiornermut atorineqartut il.il.)

Tamatuma saniatigut Namminersorlutik Oqartussat imaluunniit kommunit ininik allanik, ataatsimiittarfinnik illuutinilluunniit inissianut siunertanit allaanerusumik attartornerannut akiliutinut piunasaqaataat pineqartunut ilanngutsinneqarput. Tamanna paasineqassaaq attartornermut tunngasuni attartornermut akiliummut piunasaqaat, pisortat illumi ininik attartornermut akiliummut piunasaqaataannik pinngitsaaliissummik akiliisitsiniartarneq pillugu Kalaallit Nunaanni eqqartuussisarnermik inatsimmi § 698, imm. 2, nr. 2-mi oqaasertaliinerup saniatigut inissisimasooq. Taamaaliornermi akileraaruseriffiup pinngitsaaliissummik akiliisitsiniarnissamut piginnaatitaaneri, inuussutissarsiornermut attartornerit assigiinngitsut pineqartunut ilaaterlugit, annertusitinneqarput, tassani taakkua taamaangippat oqaatsip ”illumi ini” avataaniilissammata, taanna inissianut siunertanut initut paasineqartarmat.

Nr. 4-mut

Siunnersuutigineqarpoq, § 3, imm. 6, atorunnaarsinneqassasooq, tassani inatsimmi § 3 a-mi aalajangersagaq taamaaqataa nutaanerusorlu atuutereermat. Tassani teknikkikkut sunniutaasumik iluarsiiineq pineqarpoq.

Nr. 5-imut

Siunnersuutigineqarpoq, ilanngaaticinnissinnaatitaaneq annertusitinneqassasooq. Tamanna aamma tunniussinerit suut ilanngaaticinniffigineqarsinnaaneranngit aammalu akiligassiissutit suut ilanngaaticinninnermi matussuserneqarsinnaaneranngit tunngatillugu atuuppoq.

Akiligassiinernik tunniussinerni ilanngaaticinnissinnaalerneq

Siunnersuutigineqarpoq, ilanngaaticinnissinnaalerneq aammattaaq akiligassanik, assersuutigalugu akiligassiissutini assigisaannilu, akiliinissamut atatillugu pisortat tunniussineranni pisinnaassasooq.

Taamaaliornermi paasineqassaaq pisortat akiligassamik, pilersuisumit nioqqtissamik imaluunniit kiffartuussinermik pisinerminni tigusaannik, akiliinerat.

Pisartut nalinginnaasuunerpaat tassaassapput, isumaqatigiissut nioqqtissanik imaluunniit sullissinernik pilersuisumut, peqatigisaanik pisortanut akilinngitsuukkanik akiitsoqartumut, isumaqatigiissutigisimasaat tunngavigalugu pisortat akiliinissaaq. Tamanna assersuutigalugu tassaasinnaassaaq sanasut suliffeqarfiat, suliaqarnerminut Namminersorlutik Oqartussat sullillugit suliarisimasaminnut akiligassiissummik nassiussisimasoq, aammalu suliffeqarfik peqatigisaanik kommunimut eqqaavilerinermut akiligassiissummumut akilinngitsuukkanik akiitsoqarluni. Pisumi taamaattumi siunnersuutigineqarpoq kommuni akiligassiissummumut tiguisussatut Namminersorlutik Oqartussat akiligassiissutip aningaasartaannik tunniussinissaq ingerlattussanngorpassuk, ilanngaatiginnissinnaassasoq. Tunniussinermi taamaalilluni aningaasat sanasup suliffeqarfiata kommunimut akiitsuinut naapertuuttut ilanngaatigineqassapput. Taamaaliornermi Namminersorlutik Oqartussat tunniussinermi ilaat suliffeqarfiup kommunimut akiitsuinik akilinngitsuukkanik annikillisitsinissamut imaluunniit naligiissaanissamut atorneqassaaq. Tamatuma kingorna aningaasartai sinneqarpara, suliffeqarfimmumut taakkua tunniunneqassapput.

Aalajangersakkami siunnersuutigineqartumi, ullumikkut akiliisitsiniartartup ingerlatsinerani taarsiititsilluni akiliisitsisoqarluni pisartut ilai ilaaterlugit, ilanngaatiginnissinnaatitaaneq annertusitinneqarpoq. Kisiannili akiliisitsiniartartup ingerlatsisarneri taakkua, taagorneqartut taarsiititsilluni akiliisitsinernik ingerlatsinerit, akileraaruseriffimmi annertuunik isumalluutunik atuiffiusariaqartarput. Tamatumunnga atatillugu inatsisit malillugit pisussat annertuujupput. Taarsiititsilluni akiliisitsinernik ingerlatsinerit kingunerisarpaat, akileraaruseriffiup pisortat akiligassiinernik tunniussinissaanni taarsiititsilluni akiliisitsinnaalernera, tassami tamatumunnga piunasaqaatit naammassineqarsimalissammata. Taamaattumik ilanngaatiginnissinnaatitaanerup annertusitinnissaanni siunnersuutigineqartumi akiitsoqartup inatsisitigut isumannaatsuunissaa pilliutigineqassanngilaq. Kisiannili akileraaruseriffiup akiliisitsiniarnermik suliaqarnera sunniuteqarluarnerulersinneqassaaq, tassami taarsiititsilluni akiliisitsinernik ingerlatsinerimut atasumik suliat ingerlasarneri isumalluutunik atuiffiusartut, suliat ingerlanerinit ingerlaannartunngortinneqartunit taarserneqarsinnaalissammata.

Akiligassiissutaasartunik, ilanngaatiginnissinnaalernermi matussuserneqarsinnaasunik, annertusititsineq

Siunnersuutigineqarpoq, akiligassiissutit ilanngaatiginnissinnaalernermi matussuserneqarsinnaasut allattorsimaffiannut atuuttumut akiligassiissutaasartut arlallit ilanngunneqassasut, taamaalilluni akiligassiisarnermi ilanngaatiginnissinnaatitaaneq § 2-mi siunnersuutigineqartumi allassimasut annertoqqatingajaanik annertussuseqalissalluni. Taamaalilluni siunnersuutigineqarpoq, inatsimmi § 1, imm. 2-mut innersuussineq ilanngunneqassasoq. Allattuiffiup tamakkerlugu ilanngunnissaa naleqquttoq naliliisoqarpoq, tassami tamanna akileraaruseriffiup akiliisitsiniarnermik

suliaqarneranut pitsaanerpaanik sinaakkusiisussaammat, taamatullu innuttaasut inatsisitigut isumannaatsuunerat pilliutigineqartussaananani.

Akiligassiissutaasartut, akileraaruseriffiup ilanngaatiginnissinnaalernerani matussuserneqarsinnaasut annertusitinnissaanni siunnersuutigineqartumi, akiligassiissutip suminggaaneerpera eqqarsaatiginagu sakkussatut annertunerusumik atorneqarsinnaalissaaq. Taamaaliornermi suliap ingerlasarnera ingerlaavartunngortinneqarsinnaanerulertussaalluni, tassami isumalluutinik atuiffiusumik atortoqarani toqqartuisoqartarunnaassammat.

Tamatuma saniatigut naliliisoqarpoq siunnersuut innuttaasut inatsisitigut isumannaatsuunissaannut atatillugu ajornartorsiutitaqassanngitsoq, tassami siunnersuutigineqartumi, akiligassiissutinik tunniussinermi ilanngaatiginnissinnaanermut atatillugu matuma siuliani taaneqartutut, taamaaqataanik nalilersuinissaaq pisussaammat. Maannakkut isumalluutinik atuiffiusumik taarsiititsilluni akiliisitsinermut suleriaaseqarneq, annertunerpaatigut ilanngaatiginnissinnaalerneramik taarserneqartussaassaaq.

Akiligassiissutinut tunngatillugu aammattaaq siunnersuutigineqarpoq, aningaasarsianik annertunaarlugit tunniunneqarsimasunik utertillugit akiliinissamut pisortat piumasaqaataannut matussutissatut ilanngaatiginnittoqarsinnaassasoq. Tamatuma saniatigut siunnersuutigineqarpoq, ininik inuussutissarsiorfiusussanik attartornermut aamma qatserinermut atortunik tunisinermut akiliutissanut piumasaqaatinik matussusiinissamut ilanngaatiginnittoqarsinnaassasoq. Siunnersuummut nr. 2-mut nassuiaatit innersuussutigineqarput, tassani tamanna erseqqinnerusumik nassuiarneqarmat.

Nr. 6-imut

Siunnersuutigineqarpoq § 6 atorunnaarsinneqassasoq, tassami akiligassiissutinut taaneqartunut akiliisussaaneq, tamatumunnga inatsimmi ataaniittumi allassimammat.

Nr. 7-imut

Siunnersuutigineqarpoq, neqeroortitsinermut innersuussut peerneqassasoq, tassami neqeroortitsisarnermut inatsimmi tamanna pillugu immikkut maleruagassaaq assingusoq atuummat. Taamaalilluni pisortat neqeroortitsisarnerini pissutsit aalajangersimasut erseqqinnerusut arlallit atuupput. Taamaalilluni pissutsit taakku tamatigoortumut ilaatinnagit tamakku pillugit inatsisini aalajangersimasuni inatsisilersugaanissaasa tulluarnerpaanissaa nalilersuutaavoq.

Tamatuma saniatigut siunnersuutigineqarpoq inatsimmi oqartussanut taaguutit, Namminersorlutik Oqartussat atuutilernerisa kingorna atorneqartunik, nutarterneqassasut.

Nr. 8-mut, 9-mut, kiisalu 11-mit 14-imut, aamma 16-imut

Siunnersuutaavoq, inatsimmi oqartussanut taaguutit, Namminersorlutik Oqartussat atuutilernerisa kingorna atornerqartunik, nutarterneqassasut, soorlulusooq siunnersuummi § 1, nr. 1-imi inatsimmik taaguutip allangortinnerata kingornatigut aalajangersakkamik tamatuma kingunerisaatut assigiissitsilerluni naqqiissuteqarnissaq siunnersuutigineqarluni.

Nr. 10-mut

Siunnersuutigineqarpoq, akiligassiissutinut akiliisitsiniarnissamut tunniunneqartunut piunasaqaatit pillugit aalajangersakkamut atuuttumut annikinnerpaaffissanut killissaq ilanngunneqassasoq, taamaalillutik akileraartitsisarfirmi akiligassanngortillugit nassiunneqartutut akileeqqusissutit 100 koruunit sinnersimalissallugit.

Annikinnerpaaffissanut killissaq 2021-mut Aningaasanut inatsimmiilli, aningaasanut inatsimmi ”Suliassa qarfirmut 20-24-mut Aningaasaqarnermut Naligiissitaanermullu” oqaasertaliussa nr. 3 atuussimavoq. Taamaalilluni maleruagassaq atuuttoq, ullumikkut ukiumoortumik aningaasanut inatsimmi allassimasoq, inatsimmut aalajangersimasumut nuutinneqartoq tassani pineqarpoq.

Tamatuma saniatigut siunnersuutigineqarpoq, kommunit akiligassiissutaannut ulluni 14-ini piffissaliinissaq ilanngunneqassasoq. Tamatumani siunertaavoq, kinguaattoorluni akiliutit, kommunimiit akileraaruseriffimmut akiligassiissummik nassiussinerit paarlallugit, pisoqartarnerinik killilersimaarinninnissaq. Taamaaliornermi akileraaruseriffiup akiligassiissutinik akilernerqareersunik akiliisitsiniarnermik iliuseqarsinnaanera killilersimaarneqassaaq.

Tamatuma saniatigut kommuninit akiligassiissutaasunut qaammatisiutini ulluni 14-ini piffissaq akiliinngiffiusussap ilanngunnissaa siunnersuutigineqarpoq. Oqaasertaliussatut akileeqqusissummut piffissaliussamit naatsorsorlugu qaammatisiutini ullut ilivitsut 14-iuneri paasineqassapput, tassalu kommunimit akileeqqusisumit akileraaruseriffimmut nassiunneqarsinnaanissaata tungaanut.

Nr. 15-imut

Ataani normuni allannguutit kingunerisaaatut assigiissitsilerluni naqqiissuteqarnikkut qulequttap “Agguaanermut aalajangersakkat” atorunnaarsinnissaa siunnersuutigineqarpoq.

Nr. 17-imut

§ 11 e-p atuutereertup atorunnaarsinnissaa, aammalu aalajangersakkamik nutaamik tassanga taarsiisoqarnissaa siunnersuutigineqarpoq.

Aalajangersakkami nutaami tassani siunnersuutigineqarpoq, akiliisitsiniarnermut atatillugu allakkiat nammineq allalluni atsiorneqartinnagu imaluunniit atsiornera maskinatigut nuutsillugu, ingerlaannartumik tunniunneqarsinnaanissaat pillugu maleruagassanik aalajangersaanissamut Naalakkersuisut piginnaatinneqassasut. Pisortanut akiitsunik akilinngitsuukkanik

akiliisitsiniartarnek pillugu Namminersorlutik Oqartussat nalunaarutaata iluarsaanneqarnerani pisussami aalajangersakkap atorineqarnissaa naatsorsuutigineqarpoq.

Aalajangersakkap oqaasertalerneqarnerani siunertaavoq, pisortat ingerlatsivianni oqartussamit allakkiat atsiorneqarsimanissaat pillugu pisortat ingerlatsinerannut inatsisini piumasqaatini ilaatitsinninnissaq, nalunaarutikkut pisinnaassasoq. Aalajangersakkamut ilaatigut tunngavigineqarpoq, akileraaruseriffiup allakkianik ingerlaannartumik allakkiannngortinneqartunik amerlasuunik nassiussisarnera. Allakkiat taakkua tamarmik immikkut atsiorneqarsimanissaat sulisullu atiata allassimanissaa, tulluanngissinnaavoq.

Eqqarsaataavoq allakkiat pineqartut taakkua nalunaarutitut ilusilimmi allassimassasut, taamaalilluni allakkiat aalajangersarneqartut tassani pineqarnerat qulakkeerneqassalluni.

Nr. 18-imut

§ 11 f-ip atuutereertup atorunnaarsinnissaa, aammalu aalajangersakkamik nutaamik tassanga taarsiisoqarnissaa siunnersuutigineqarpoq.

Aalajangersakkami nutaami siunnersuutigineqarpoq, ingerlaannartumik aningaasarsianit unerartitsisarnek pillugu suliasani suliasanik suliarinninneq pillugu maleruagassanik aalajangersaanissamut Naalackersuisut periarfissinneqassasut.

Akiitsullip isertitaasa A-t aammalu aningaasarsianit unerartitsinissaq pillugu suliami taassuma unerartitassanut qanoq procentiliiffigineqarnissaata imminnut ataqatigiinnissaannut isertitat annertusiartuaartinnerannik/takussutissiamik nalunaarummi aalajangersaanissamut piginnaatitsissut periarfissiivoq. Annertusiartuaartitsineq taanna aningaasarsianit unerartitsineq pillugu suliasani suliarinninnerup ingerlaannartunngortinnissaanut atorineqarsinnaassasoq naatsorsuutigineqarpoq.

Annertusiartuaartitsinermi inuuniarnermi pisariaqartitat aammalu innuttaasumut nalinginnaasumut naapertuuttumik agguaqatigiissillugulu aningaasartuutissat ilanngullugit naatsorsuinissaq sillimaffigineqartussaapput, taamaalilluni taanna nalinginnaasumik inuuniarnermini pisariaqartitaannik arsaarneqassanani. Taamaalilluni aamma akiliisinnaassuseqarnerup qanoq nalilersornissaanut aammalu naliliinermi tassani suut ilaatinneqarnissaannut, ilanngullugit isertitat aamma aningaasartuutissat naapertuuttut, maleruagassanik aalajangersaasinnaanermut piginnaatitsissuteqarnek imaqarpoq.

Nr. 19-imut

Ataani normuni allannguutinik kingunerisaatut assigiissitsilerluni naqqiissuteqarnikkut qulequttap "Akiliisarnerit" atorunnaarsinnissaa siunnersuutigineqarpoq.

Nr. 20-mut

Siunnersuutigineqarpoq § 11 g atuuttoq atorunnaarsinneqassasoq aammalu aalajangersakkamik nutaamik taassuminnga taarserneqassasoq.

Siunnersuutigineqarpoq, akiligassiissutit ataasiakkaat 100 koruuninik annikinnerusumilluunniit aningasartai sinneqalerpata, akileraaruseriffiup akiligassiissutit pisassalinnut utertissinnaassagai pillugit aalajangersagaq nutaaq atuutsinneqalissasoq. Inatsisip oqaasertaanni akiligassiisumut utertitsineq atorineqarpoq, tassami akileraaruseriffik isumakkeerinissamut imaluunniit allatut aningaasat kommuninut allanullu utertinneqartut qanoq pineqassanersut isummerfiginissaanut piginnaatitaanngimmat.

100 koruuninut killiliineq, akiligassiissutinik 100 koruunit sinnerlugit akiliisitsiniarnissamut nuussisarnermut annikinnerpaaffissatut killiliussaq pillugu siunnersuummi nr. 11-mut ataqatigiissillugu isigineqassaaq. Siunnersuut pingaarnertigut 2021-mut Aningaasanut inatsimmili, aningaasanut inatsimmi ”Suliassaqarfimmut 20-24-mut Aningaasaqarnermut Naligiisitaanermullu” oqaasertaliussami nr. 2-mi inatsimmi aalajangersaaneruvoq. Taamaalilluni ukiumoortumik aningaasanut inatsisaasuni takuneqarsinnaasutut malittarisassiap atuutereertup inatsimmi ilanngunneqarnissaa taamaallaat pineqarpoq, taamaattorli siunnersuutip 100 kr.-nik killeqarfimmik imaqarnerani oqaasertaliussani aningaasat 300 kr.-uneranik annikinnermik iluarsinertaqartillugu.

Tamatuma saniatigut siunnersuutigineqarpoq, akiligassiissutit ataasiakkaat aningaasartai pingaarnertit imaluunniit aningaasartai sinneruttut 100 koruuninik annikinnerusumilluunniit annertussuseqarpata, kommunit aamma Naalakkersuisut nammineeurlutik akiligassiissutiminnik isumakkeerinissamut piginnaatinneqassasut. Aalajangersagaq aqutsisoqarfimmi malittarisassiatut isigineqassaaq, taanna akileeqqusissutit annikitsut isumakkeerfiginissaannut kommuninut aamma Namminersorlutik Oqartussanut aqutissamik tunisisuulluni. Tunngavissaq kommunip pisinnaatitaaffianut aammalu inatsisini ingerlatsinermut tunngasuni taarsigassanik isumakkeerisarnerit pillugit, kiisalu tamakku pillugit allaqqassasut malittarisassat pillugit najoqqutarisat sinnerinut ilassutissatut isumaliutigineqarpoq, ilanngullugit assersuutigalugit Akileraaruserinermik ingerlatsineq pillugu Inatsisartut inatsisaanni §§ 53-57-iniittut.

Nr. 21, 22 aamma 24-mut

§ 12-imi aalajangersakkap § 12, imm. 3-tut nutaangortillugu nuunneqassasoq, aammalu oqaasertamigut nutarsarneqassasoq siunnersuutigineqarpoq, taamaalilluni inatsisilioriaatsimi malittarisassanut atuuttunut pineqaatissiinermut inunnut inatsisitigut pisinnaatitaasunut aalajangersagaq naapertuutilissammat. Taamaalilluni teknikkikkut allangortitsineq taamaallaat tassani pineqarpoq, tassami suleriaaseq allangortinnagu ingerlatiinneqarmat.

Tamatuma kingunerisaatut § 12, imm. 3 imm. 4-tut nutaatut nuunneqarpoq, soorlulusooq taanna oqaasertalersugaanermigut taamatutaaq nutarsarneqarluni.

Tamatuma sanatigut § 12 c-p § 12-imut imm. 5-itut nutaatut nuunneqarnissaa siunnersuutigineqarpoq.

Tamatuma kingunerisaatut § 12 b aamma § 12 c paragraffitut immikkoortutut atorunnaarsitaapput.

Nr. 23-mut

Namminersorlutik Oqartussat eqqunneqarnerisa kingornatigut taakkununga atorneqartunut inatsimmi pisortanik taaguutaasut nutarsarneqarnissaat siunnersuutigineqarpoq. Tamatuma saniatigut aalajangersakkami imm. 2 imatut nutarsarneqassasoq, taamaalilluni inatsimmi innersuussissutaasoq atuuttumut allangortillugu siunnersuutigineqarpoq.

Nr. 25-mut

§ 13-ip oqaasertalersugaaqqinnissaa siunnersuutigineqarpoq. Ilaatigut pisortat taaguutaannik aamma inatsisip taaguutaanik allangortitamik nutarsaaniarluni, ilaatigullu imm. 2-mik aamma imm. 3-mik atorunnaarsitsiniarluni. Imm. 2 attuumassutilittut isigineqarunnaarmat atorunnaarsinneqarpoq, aammalu imm. 3 siunnersuummi § 1, nr. 6-ip, § 6-imik, § 13, imm. 3-imi innersuussutigineqartumik kingunerisaatut assigiissitsilerluni naqqiissuteqarnertut atorunnaarsinneqarluni.

§ 2-mut

Siunnersuutigineqarpoq inatsit ulloq 1. januar 2027 atuutilissasoq.

Inatsisartut inatsisaat inatsimmi ilaasutut akileeqqusissutinut tamanut kingumut atuutilersumik atuuppoq, apeqqutaanatik qaqugukkut akileeqqusinerit pinngorsimani, imaluunniit pinngortuuneri.

Ilanngussaq 1

Siunnersuut inatsimmut atuuttumut sanilliullugu	
<i>Oqaasertalerneqarnera atuuttoq</i>	<i>Siunnersuut</i>
	§ 1 Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaanni nr. 3, 2. maj 1996-imeersumi, kingusinnerusukkut Inatsisartut inatsisaanni nr. 13, 3. juni 2015-imeersumi allanngortinneqartumi, makkua allanngortinneqarput:
Pisortanut akiitsut akilersinniarneqartarnerat pinaveersaartinneqarnissaallu pillugit Inatsisartut inatsisaa	1. Inatsisip qulequtaa imatut oqaasertalerneqarpoq: Pisortanut akiitsunik akilinngitsuukkanik akiliisitsiniartarneq pillugu Inatsisartut inatsisaa.
§ 1. Inatsisartut inatsisaanni matumani Kalaallit Nunaanni Namminersornerullutik Oqartussat Kalaallillu Nunaanni kommunit akiligassiissutaannik akiliisitsiniartarneq pineqarpoq. <i>Imm.</i> 2. Inatsisartut inatsisaa pisassarisanut Inatsisartut inatsisaa peqqussutaallu makkua tunngavigalugit pilersimasunut atuuppoq: 1) Aningaasarsianit akileraarutit pillugit Inatsisartut inatsisaa, 2) Akileraaruserinermik ingerlatsineq pillugu Inatsisartut inatsisaa, 3) Pappiaqqanik nalilinnik naqissusiinermi akitsuut pillugu Inatsisartut inatsisaa, 4) Eqquiniaasitsinermi akileraarutit pillugit Inatsisartut inatsisaa, 5) Aningaasanik ikisilluni pinnguaatinut akileraarut pillugu Inatsisartut inatsisaa, 6) Umiarsualivimmiinnermut aamma umiarsuit takornarianik angallassissutit ilaasunik angallassinerrannut akileraarutit pillugit Inatsisartut inatsisaa,	2. § 1 imatut oqaasertalerneqarpoq: ” § 1. Matumani Inatsisartut inatsisaa kommunit aamma Namminersorlutik Oqartussat akiligassiissutaannik akiliisitsiniartarnermut tunngassuteqarpoq. <i>Imm.</i> 2. Inatsisartut inatsisaa Inatsisartut inatsisai Inatsisartullu peqqussutai makkua naapertorlugit akiligassiissutaalersimasunut atuuppoq: 1) Aningaasarsianit akileraarutit pillugit Inatsisartut inatsisaa. 2) Akileraaruserinermik ingerlatsineq pillugu Inatsisartut inatsisaa. 3) Pappiaqqanik nalilinnik naqissusiinermi akitsuut pillugu Inatsisartut inatsisaa. 4) Eqquiniaasitsinermi akileraarutit pillugit Inatsisartut inatsisaa. 5) Aningaasanik ikisilluni pinnguaatinut akileraarut pillugu Inatsisartut inatsisaa. 6) Umiarsualivimmiinnermut aamma umiarsuarni takornariartaatini ilaasunut akileraarutit pillugit Inatsisartut inatsisaa. 7) Qamutit motorillit akileraarutaat pillugit Inatsisartut inatsisaa.

<p>7) Qamutit motorillit akileraarutaat pillugit Inatsisartut inatsisaat,</p> <p>8) Raajanut akitsuutit pillugit Inatsisartut inatsisaat,</p> <p>9) Inuussutissarsiutitigut ilinniagaqarnermut sulisitsisut akiliutaat pillugit Inatsisartut inatsisaat,</p> <p>10) Sulisoqarnermut akitsuut pillugu Inatsisartut inatsisaat,</p> <p>11) Imigassat ethanolimik akullit Kalaallit Nunaanni sananeqarsimasut akitsuutaat pillugit Inatsisartut inatsisaat,</p> <p>12) Meeqqanut ileqqaakkat pillugit Inatsisartut inatsisaat,</p> <p>13) Ilinniagaqarnermut pillugit Inatsisartut peqqussutaat,</p> <p>14) Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat,</p> <p>15) Meeqqanut akilersuutit il.il kiisalu meeravissartaarnermi tapiissutit tunniunneqartarneri pillugit Inatsisartut peqqussutaat,</p> <p>16) Pisortanit ikiorsiissutit pillugit Inatsisartut peqqussutaat,</p> <p>17) Inissianik attartortitsisarneq pillugu Inatsisartut peqqussutaat,</p> <p>18) Inissialiornermut tapersiissuteqartarneq pillugu Inatsisartut peqqussutaat,</p> <p>19) Aalisarnermut, piniarnermut nunalerinermullu tapersiisarneq pillugu Inatsisartut peqqussutaat</p> <p>20) Aalisarnermik, piniarnermillu inuussutissarsiutillit inuussutissarsiornernik siuarsaaneq pillugu Inatsisartut peqqussutaat,</p> <p>21) Nunalerinermut tapersiisarneq pillugu Inatsisartut peqqussutaat,</p> <p>21) Aalisarnermut aningaasaliissutinut immikkoortitat pillugit Inatsisartut inatsisaat,</p>	<p>8) Aalisarnermi pisarineqartut isumalluutininik atuinnermut akitsuutaat pillugit Inatsisartut inatsisaat.</p> <p>9) Pigisanit pissarsiat ilaasa akileraaruserneqartarnerat pillugu Inatsisartut Inatsisaat.</p> <p>10) Sulisoqarnermut akitsuut pillugu Inatsisartut inatsisaat.</p> <p>11) Imigassat aalajangersimasut Kalaallit Nunaanni sananeqarsimasut akitsuutaat pillugit Inatsisartut inatsisaat.</p> <p>12) Kulturikkut ingerlatsineq sunngiffimmilu sammisassaqaqtitsineq pillugit Inatsisartut inatsisaat.</p> <p>13) Ilinniagaqarnermut pillugit Inatsisartut inatsisaat.</p> <p>14) Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat.</p> <p>15) Meeqqanut akilersuutit il.il. kiisalu meeravissartaarnermi tapiissutit tunniunneqartarneri pillugit Inatsisartut peqqussutaat.</p> <p>16) Pisortanit ikiorsiissutit pillugit Inatsisartut Inatsisaat.</p> <p>17) Tapersiissutitalimmik inissialiortiternermut taarsigassarsititsisarneq pillugu Inatsisartut inatsisaat.</p> <p>18) Inissianik attartortitsisarneq pillugu Inatsisartut peqqussutaat.</p> <p>19) Nukissiornermi ikummatissat avatangiisinut akitsuutaat pillugu Inatsisartut inatsisaat.</p> <p>20) Aalisarnermik piniarnermillu inuussutissarsiutillit inuussutissarsiornernik siuarsaaneq pillugu Inatsisartut inatsisissaattut.</p> <p>21) Nunalerinermik inuussutissarsiornernik siuarsarneqarnissaa pillugu Inatsisartut inatsisaat.</p> <p>22) Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminut periarfissaat pillugit Inatsisartut inatsisissaat.</p> <p>23) Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat.</p>
---	---

<p>22) Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisissaa,</p> <p>23) Takornarianut, Nunamilu suliffeqarfiit siuarsarneqarnissaannut Inatsisartut inatsisaat,</p> <p>24) Biblioteqarnermi Inatsisartut peqqussutaat aamma</p> <p>25) Unammillernermi Inatsisartut inatsisaa.</p> <p><i>Imm. 3. Aammattaq Kalaallit Nunaanni Namminersornerullutik Oqartussat kommunillu akiligassiissutaat, paaqqinnittarfinni angerlarsimaffimmilu ulluunerani meeqqanik paaqqinnittarnernut, kiassarnermut, innaallagissamut, imermut, eqqaanermut, pujoorfinnik paaviaanermullu innuttaasut suliffeqarfiillu akiligassaasa akilersinniarneqartarnerini Inatsisartut inatsisaat manna atuuppoq.</i></p>	<p>24) Atuagaateqarfiit pillugit Inatsisartut inatsisaat.</p> <p>25) Unammilleqatigiinneq pillugu Inatsisartut inatsisaat.</p> <p>26) Peqqinnissaqarfiup sullissineri il.il. pillugit Inatsisartut peqqussutaat.</p> <p>27) Sermip erngullu niuernikkut iluaqutigineqarnissaat pillugu Inatsisartut inatsisaat.</p> <p>28) Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat.</p> <p>29) Aatsitassat pillugit ingerlatallu tamatumunnga pingaarutillit pillugit inatsisartut inatsisaat.</p> <p>30) Aatsitassanut tunngasunik suliaqarneq pillugu Inatsisartut inatsisaat.</p> <p>31) Naartunermi, erninermi meeravissartaarnermilu sulinngiffeqartarneq pillugu Inatsisartut inatsisaat.</p> <p>32) Utoqqalinersiaqarneq pillugu Inatsisartut inatsisaat.</p> <p>33) Siusinaartumik pensionisiat pillugit Inatsisartut inatsisaat.</p> <p>34) Meeqqanut tapiissutit pillugit Inatsisartut inatsisaat.</p> <p>35) Suliffissarsiortunut ikiorsiissutit pillugit Inatsisartut Inatsisaat.</p> <p>36) Pilersaaruserneq aamma nunaminertat atorneqartarnerat pillugit Inatsisartut inatsisissaat.</p> <p>37) Avatangiisit innarlitsaaliorneqarnissaanik Inatsisartut inatsisaat.</p> <p>38) Imaani avatangiisit illersorneqarnissaat pillugu Inatsisartut inatsisaat.</p> <p>39) Inuit innarluutillit tapersorneqarnissaannut Inatsisartut inatsisaat.</p>
--	---

	<p>40) Kalaallit Nunaanni annaassiniarnissamut upalungaarsimaneq aamma ikualattoornissamik qaartoonissamillu pitsaaliuinermi iliuusissat pillugit Inatsisartut inatsisaat.</p> <p>41) Sanaartorfissagissaaneq, pisortat kuuffeqarfinnut aqqusersuutaat aamma pisortat aqqusiniutaat pillugit Inatsisartut inatsisaat.</p> <p>42) Meeqqanut sulii atualinngitsunut perorsaanikkut inerikkiartuutaasunik ulluunerani neqeroorutit pillugit Inatsisartut inatsisissaattut siunnersuut.</p> <p>43) Aalisarnermut aningaasaliissutinut immikkoortitat pillugit Inatsisartut inatsisaat.</p> <p>44) Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat.</p> <p>45) Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaat.</p> <p>46) Najukkani aatsitassanut tunngasunik suliaqarneq pillugu Inatsisartut inatsisaat.</p> <p>47) Illut piginneqatigiit pigisaat pillugit Inatsisartut inatsisaat.</p> <p>48) Illunut aningaasaliisarnerit pillugit Inatsisartut inatsisaat.</p> <p>49) Aalisarneq pillugu Inatsisartut inatsisaat.</p> <p>50) Takornariartitsinermik ingerlataqarneq aamma inuussutissarsiutigalugu ingerlatsinermi zonenut immikkoortiterineq il.il. pillugit Inatsisartut inatsisaat.</p> <p>51) Unnuinermi akitsuut pillugu Inatsisartut inatsisaat.</p> <p><i>Imm. 3.</i> Inatsisartut inatsisaat aamma kommunit aamma Namminersorlutik Oqartussat innuttaasut suliffeqarfiillu kiassarnermut, innaallagissamut imermullu akiliinissamut pisussaaffinni</p>
--	---

	akiligassiissutaannik akiliisitsiniarnermi atuuppoq.”
<p>§ 2. Pisassarisat § 3, imm. 4 aamma 5-imi taaneqartut pisassarisallu meeqqanut ileqqaakkat pillugit inatsit naapertorlugu, ilinniagaqarnersiutit pillugit Inatsisartut peqqussutaat, inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaat, pisortanit ikiorsiissutit pillugit Inatsisartut peqqussutaat, bibliotekeqarneq pillugu Inatsisartut peqqussutaat naapertorlugit kiisalu Namminersornerullutik Oqartussat kommunillu ulluunerani meeqgerivinnut pujoorfinnillu paaviaanernut akiliutinik pisassarisaat, Kalaallit Nunaanni eqqartuussisarnermik inatsimmi eqqartuussutinik il.il. naammassiniartarnermut malittarisassat malillugit pinngitsaaliinikkut akilersinneqarsinnaapput.</p>	<p>3. § 2 imatut oqaasertalerneqarpoq: ” § 2. Akiligassiissutit makkua Kalaallit Nunaanni eqqartuussisarnermik inatsimmi akiligassiissutinik pinngitsaaliissummik naammassinnitsitsisarneq pillugu kapitali 46-mi aamma 47-mi maleruagassat malillugit pinngitsaaliissummik naammassitinneqarsinnaapput:</p> <ol style="list-style-type: none"> 1) Akiligassiissutit § 3, imm. 4-mi aamma 5-imi taaneqartut. 2) § 1, imm. 2, nr. 12-17-imi, aamma nr. 20-50-imi ilaasutut akiligassiissutit. 3) Kommunit aamma Namminersorlutik Oqartussat aningaasarsianik annertunaarlugit tunniunneqarsimasunik utertillugit akilerneqarnissaannik piunasaqaataat. 4) Kommunit aamma Namminersorlutik Oqartussat qatserinermut atortussanik tunisinermut akiliinissamut piunasaqaataat. 5) Kommunit aamma Namminersorlutik Oqartussat ininik, ataatsimiittarfinnik imaluunniit illuutinik, illup initarinngisaannik, attartornermut akiliinissamut piunasaqaataat.”
<p>§ 3, imm. 6: Imm. 6. Aningaasat imm. 1 naapertorlugu ilanngartuutaasimasut qaammatip ilanngaassuiffiqineqarsimasup ulluisa kingullianni akiligassanngussapput, kingusinnerpaamillu akilerneqartussaallutik qaammatip tulliani ulluinnarmi kingullermi.</p>	<p>4. § 3, imm. 6, atorunnaarsinneqarpoq.</p>
<p>§ 5, imm. 1: § 5. Akileraarutinut akiliutaavallaarsimasut utertinneqalerneranni kommunit, pissarsisussap utertitassanngorlugit ikiorsiissutinut,</p>	<p>5. § 5, imm. 1, imatut oqaasertalerneqarpoq: ”Akileraarutinik annertunaarlugit akilerneqarsimasunik utertillugit akiliinermi aammalu kommunip imaluunniit</p>

<p>pilersuisussaatitaanermut akilersuutitut siumoortumik tunniunneqartartunut, inuussutissarsiutitigut suliffeqarfinnut aningaasatigut attartortissimasa-nut, kommunit inuussutissarsiutitigut suliffeqarfinnut il.il. aningaasaliinermikkut inuussutis-sarsiutinik ineriartortitseqataasinnaanannut atatillugu pisassarisanut, kiisalu paaqqinnittar-finni angerlarsimaffinnilu ulluunerani paaqqinnittarnermut, eqqaanermut pujoorfinnillu paavi-aanermut pisassarisanut akilerneqartussanngoreersimagaluartunut akiligassarisaanut naaper-tuuttunik ilanngartuisinnaatitaapput.</p>	<p>Namminersorlutik Oqartussat inunntut imaluunniit inatsisitigut pisinnaatitaasunut nioqutissanut sullissinernullu akiliuteqarneranni, kommunit aamma Namminersorlutik Oqartussat pisinnaatitaasup akiligassiissutit makkua pillugit akiitsuusa akiligassanngoreersut akilerneqanngitsut aningaasartaattut annertussusilinnik ilanngaassisinnaapput:</p> <ol style="list-style-type: none"> 1) Akiligassiissutit § 1, imm. 2-mi aamma imm. 3-mi ilaasut. 2) Aningaasarsiat annertunaarlugit tunniunneqartut utertillugit akilerneqarnissaannut akiligassiissutit. 3) Qatserinermut atortussanik tunisiner akiliutissanut akiligassiissutit. 4) Ininik illup initaannit allaanerusunik attartornermut akiliutissanut akiligassiissutit.”
<p style="text-align: center;"><i>Akisussaaqatigiinneq</i></p> <p>§ 6. Aappariit inuillu nalunaarsorneqarsimasumik aappariittut inooqatigiit, inissianik attartorneq pillugu Inatsisartut peqqussutaat tunngavigalugu akiligassanut kiisalu eqqaanermut pujoorfinnillu paaviaanermut atatillugu Namminersornerullutik Oqartussat kommunillu akiligassiissutaannut assigiimmik akisussaaqatigiipput.</p> <p><i>Imm. 2.</i> Imm. 1 naapertorlugu assigiimmik akisussaaqatigiinneq, aappariinnerup imaluunniit aappariittut nalunaarsorneqarsimasutut inooqatigiinnerup nalaani akiligassiissutaasimasunut taamaallaat atuuppoq.</p> <p><i>Imm. 3.</i> Aappariit meeqqamut meeqqanulluunniit pilersuisussaatitaanermik aalajangersaavigineqarsimanngippata imm. 1- mi aalajangersagaq aammattaaq</p>	<p>6. § 5-ip kingorna immikkoortup qulequtaa “Akisussaaneq”, aamma § 6 atorunnaarsinneqarput.</p>

<p>Namminersornerullutik Oqartussat kommunilu paaqqinnittarfiini, angerlarsimaffinnilu ulluunerani paaqqinnittarnermut akiligassiissutaannut atuutsinneqarpoq.</p>	
<p>§ 7: § 7. Sanaartugassanut suliassanullu allanut suliffeqarfiit sulisussarsiarineqarnerini imaluunnit nioqutissanik kiffartuussissutissanilluunniit inniminniisoqartillugu Naalakkersuisut kommunalbestyrelsilluunniit aalajangersinnaavaat aalajangiinnermi suliffeqarfiit akilerneqanngitsunik akileraarutitut akitsuutinullu akiligassaqartoqarnera isigineqassasoq. <i>Imm. 2.</i> Imm. 1-imi aalajangersakkat pillugit Naalakkersuisut malittarisassanik erseqqinnerusunik aalajangersaasinnaapput.</p>	<p>7. § 7 imatut oqaasertalerneqarpoq: ” § 7. Suliffeqarfiit illuliornernik sanaartornernillu suliassanik suliarinninnissamut sulisussarsiarineqarneranni, suliffeqarfiit akileraarutitut akitsuutinullu pillugit akilerneqanngitsunik, akiligassanngoreersunik akiitsoqarnerisut eqqarsaatigineqassanersoq, oqartussaq suliakkiisoq aalajangiisinnaavoq. <i>Imm. 2.</i> Aalajangiinerit imm. 1-imi taaneqartut pillugit maleruagassanik Naalakkersuisut aalajangersaasinnaapput.”</p>
<p>§ 10: § 10. § 1, imm. 2-mi aamma 3-mi Inatsisartut inatsisaat peqqussutaallu taaneqartut tunngavigalugit akiligassiissutinik akiliisitsiniartartut akiliisitsiniarneritut atatillugu akiliuteqartitsisarneq pillugu malittarisassanik Naalakkersuisut aalajangersaasinnaapput.</p>	<p>8. § 10 imatut oqaasertalerneqarpoq: ” § 10. § 1, imm. 2-mi aamma 3-mi ilaasuni akiligassiissutinik akiliisitsiniartartut akiliisitsiniarnerannut atatillugu akiligassiisarneq aamma akiliisarneq pillugit maleruagassanik Naalakkersuisut aalajangersaasinnaapput.”</p>
<p>§ 11: § 11. § 1-mi Inatsisartut inatsisaat peqqussutaallu taaneqartut tunngavigalugit akiligassiissutinik akiliisitsiniartarnermi periusaasut pillugit malittarisassanik Naalakkersuisut aalajangersaasinnaapput.</p>	<p>9. § 11 imatut oqaasertalerneqarpoq: ” § 11. § 1, imm. 2-mi aamma 3-mi ilaasuni akiliisitsiniarnermi periaasissaq pillugu maleruagassanik Naalakkersuisut aalajangersaasinnaapput.”</p>
<p>§ 11 a, imm. 3: <i>Imm. 3.</i> Akiligassiissutit akileraaruserivimmud tunniunneqassapput akiliisitsiniarnissaq anguniarlugu, tassani akiliinissamut piffissaliussa qaangerneqareersimappat, aammalu akiliisitsiniarnerit kinguneqarsimanngippata. Kommuninili pisassarisat akileraaruserivimmud</p>	<p>10. § 11 a, imm. 3, imatut oqaasertalerneqarpoq: ” <i>Imm. 3.</i> Akiligassiissutit 100 koruuninik sinnerlugit annertussusillit, akiliinissamut piffissamut killigititap qaangiutereernerani, aammalu nalinginnaasumik nukingisaarutitut suleriaatsit iluaqutaanngitsumik ingerlanneqareersimalerneranni,</p>

<p>akilersinniagassanngorlugit tunniunneqassapput akiliinissamut piffissaliussap qaangiunnerani.</p>	<p>akileraaruseriffimmut akilersinniarneqartussanngorlugit tunniunneqassapput. Kommunini akiligassiissuteqartut, akiliinissamut piffissamut killigititaq qaammatisiutini ullunik 14-inik qaangerneqarpat, akiligassiissutit akileraaruseriffimmut akilersinniarneqartussanngorlugit tunniutissavaat.”</p>
<p><i>Imm. 8. Pissutsit imm. 1-7-imi taagorneqartunut tunngatillugu Naalackersuisut maleruagassanik aalajangersaasinnaapput, ilanngullugit akileraaruserivimmut akiligassanik nuussinermi, nalinginnaasumik eqqaasitsissuteqartarnermi suleriutsimut minnerpaamik piunasaqaatit, akilersinniakkanik utertitsisarnerit, naafferartumik akilersorneqarnissamut imaluunniit akilinngikkallartinneqarsinnaasut akuerineqarsinnaasut pisassarisat annertussusiinut il.il tunngasut, aammalu naafferartumik akilersuinermi akiliinngikkallarnissamullu piffissaliussat pillugit malittarisassiat pillugit periutsit. Naalackersuisut aamma akilersinniakkat elektronikkimik atortorissaarutit atorlugit tunniunneqarsinnaanerit pillugu malittarisassanik aalajangersaasinnaapput.”</i></p>	<p>11. § 11 a, imm. 8 imatut oqaasertalerneqarpoq: <i>“ Imm. 8. Pissutsinut imm. 1-imiit 7-imut taagorneqartunut tunngatillugu, tamatumani aamma akilersinniakkanik akileraaruserivimmut tunniussinermi periusissaq pillugu, nalinginnaasumik eqqaasitsissuteqartarnermi suleriutsimut minnerpaamik piunasaqaatit pillugit, akilersinniakkanik utertitsisarnermut, naafferartumik akilersorneqarnissamut imaluunniit akilinngikkallartinneqarsinnaasut akuerineqarsinnaasut pisassarisat annertussusiinut il.il tunngasunik, aammalu naafferartumik akilersuinermi akiliinngikkallarnissamullu piffissaliussat pillugit malittarisassanik Naalackersuisut aalajangersaasinnaapput. Naalackersuisut aamma akilersinniakkat elektronikkimik atortorissaarutit atorlugit tunniunneqarsinnaanerit pillugu malittarisassanik aalajangersaasinnaapput.”</i></p>
<p>§ 11 b. Pisassarisat akileraaruserivimmut akilersinniagassanngorlugit tunniunneqartut malittarisassat Naalackersuisut aalajangigaat malillugit erniaqartinneqassapput. Naalackersuisut tamatumani pisassarisanut assigiinngitsunut erniat annertussusissaat</p>	<p>12. § 11 b, imm. 1 imatut oqaasertalerneqarpoq: <i>“ Pisassarisat akileraaruserivimmut akilersinniagassanngorlugit tunniunneqartut malittarisassat Naalackersuisut aalajangigaat malillugit erniaqartinneqassapput. Naalackersuisut tamatumani pisassarisanut</i></p>

<p>aalajangersarsinnaavaat aalajangersarlugulu erniat qanoq naatsorsorneqarnissaat.</p>	<p>assigiinngitsunut erniat annertussusissaat aalajangersarsinnaavaat aalajangersarlugulu erniat qanoq naatsorsorneqarnissaat.”</p>
<p><i>Imm. 5. Imm. 3-mik atuinissamut Naalakkersuisut malittarisassaliorsinnaapput.</i></p>	<p>13. § 11 b, imm. 5 imatut oqaasertalerneqarpoq: “ <i>Imm. 5. Imm. 3-mik atuinissamut Naalakkersuisut malittarisassaliorsinnaapput.</i>”</p>
<p><i>Imm. 3. Naalakkersuisut imm. 1 aamma 2-mi malittarisassat naammassineqarnissaannut erseqqinnerusumik malittarisassanik aalajangersaasinnaapput. Naalakkersuisut aamma pisassaqartuusut pisortanilu oqartussaasut allat elektronikki atorlugu atortorissaarutit atorlugit pisassaqartuusumut pineqartumut tunngatillugu akiligassanut kinguaattoorutit amerlassusaannik, aammalu pisassaqartunut allanut tunngatillugu akiligassanut kinguaattoorutinik peqarnersoq akileraarusersiviup paasissutissanik nalunaarsugaanut isersinnaanerannut malittarisassanik aalajangersaasinnaapput.</i></p>	<p>14. § 11 c, imm. 3 imatut oqaasertalerneqarpoq: “ <i>Imm. 3. Naalakkersuisut imm. 1 aamma 2-mi malittarisassat naammassineqarnissaannut erseqqinnerusumik malittarisassanik aalajangersaasinnaapput. Naalakkersuisut aamma pisassaqartuusut pisortanilu oqartussaasut allat elektronikki atorlugu atortorissaarutit atorlugit pisassaqartuusumut pineqartumut tunngatillugu akiligassanut kinguaattoorutit amerlassusaannik, aammalu pisassaqartunut allanut tunngatillugu akiligassanut kinguaattoorutinik peqarnersoq akileraarusersiviup paasissutissanik nalunaarsugaanut isersinnaanerannut malittarisassanik aalajangersaasinnaapput.</i>”</p>
<p><i>Agguaanermut aalajangersakkat</i></p>	<p>15. § 11 c-p kingorna immikkoortumut qulequtaq “<i>Agguaanermut aalajangersakkat</i>” atorunnaarsinneqarpoq.</p>
	<p>16. § 11 d imatut oqaasertalersorneqarpoq: “ § 11 d. Kommunit akiliisitsiniarnermut tunngasutigut innuttaasunik sullissinerat pillugu sulianilu allagaatit allagaatinillu toqqortaait qanoq annertutigisumik akileraaruserivimmut nuunneqarnissaat pillugu malittarisassanik Naalakkersuisut aalajangersaasinnaapput.”</p>
	<p>17. § 11 e imatut oqaasertalersorneqarpoq:</p>

	<p>” § 11 e. Allakkianik atsiorneqanngitsunik imaluunniit maskiinamik atsiorneri issuarneqarsimasunik imaluunniit taamaaqataanik periaaseqarfiusunik tunniussisarneq pillugu maleruagassanik Naalakkersuisut akiliisitsiniartarnermut suliassaqarfimmi aalajangersaasinnaapput, taamaalilluni allakkiaq taamaattoq inatsisitigoortumik allakkiamut inummit atsiorneqarsimasumut sanilliunneqarsinnaassalluni.”</p>
	<p>18. § 11 f imatut oqaasertalersorneqarpoq: “ § 11 f. Akiitsulinnut aningaasanik tunniussinerni ingerlaannartumik unerartitsinermi (aningaasarsianit unerartitsineq) periaasissaq pillugu maleruagassanik Naalakkersuisut aalajangersaasinnaapput, ilanngullugu akiitsulimmut tunniussinerni qanoq procentiliilluni ingerlaannartumik aningaasarsianit unerartitsisoqarsinnaanersoq aalajangersaasinnaallutik. Naalakkersuisut aalajangersaanerminni akiitsullip akiliisinnaassuseqarnissaa eqqarsaatigissavaat. Naalakkersuisut tamatuma saniatigut akiitsullip akiliisinnaassuseqarnerata aammalu akiitsullip isertitaasa A-t unerartitsinermilu procentiliussap imminnut ataqatigiinnerat pillugit naliliinermi periaasissaq pillugu maleruagassanik aalajangersaasinnaapput.”</p>
	<p>19. § 11 f-ip kingorna immikkoortup qulequtaa “<i>Akiliisarnerit</i>” atorunnaarsinneqarpoq.</p>
	<p>20. § 11 g imatut oqaasertalerneqarpoq: ” § 11 g. Akiligassiissutip aningaasartaasa sinnerat 100 koruuniuppat annikinneruppalluunniit, akileraaruseriffiup akiligassiissut akiligassiisumut utertillugu tunniussinnaavaa.</p>

	<p><i>Imm. 2. Kommunalbestyrelsit aamma Naalakkersuisut akiligassiissutitik 100 koruuninik annikinnerusunilluunniit aningaasartallit akilerneqanngitsut isumakkeerniarlugit aalajangersinnaapput.”</i></p>
	<p>21. § 12, imm. 3, imatut oqaasertalerneqarpoq: “ <i>Imm. 3. §§ 10, 11, 11 a, imm. 8, 11 b, imm. 5, 11 e, 11 f naapertorlugit najoqqutassani atuutsinneqalersuni pineqaatissiissutinik, akiliisitsissutitut ilusilinnik aalajangersaasoqarsinnaavoq.”</i></p>
	<p>22. § 12-imi imm. 4-tut aamma 5-itut ilanngunneqassaaq: ” <i>Imm. 4. Inatsisartut inatsisaat imaluunniit najoqqutassat Inatsisartut inatsisaat naapertorlugu aalajangersagaasut akiliisitsinissap aalajangersarnissaanut inatsimmi tunngavissaliisimappata, akiliisitsinissaq Kalaallit Nunaanni Pinerluttulerinermut Inatsimmi kapitali 5-imi maleruagassat malillugit ingerlatseqatigiiffiit il.il. (inatsisitigut pisinnaatitaasut pisussaataasullu) tutsinneqarsinnaavoq.</i> <i>Imm. 5. Akiliisitsissutit Inatsisartut inatsisaat manna, imaluunniit Inatsisartut inatsisaata malitsigisaatut najoqqutassat atuutsinneqalersut malillugit akiliisitsissutaasut Nunatta Karsiata pisassarai.”</i></p>
	<p>23. § 12 a, imm. 1 aamma 2 imatut oqaasertalerneqassapput: “ Akileraaruseriviup naatsorsuutigippagu unioqqutitsineq akiliisitaanermi sakkortunerusumik nassataqassanngitsoq, Naalakkersuisut pineqartoq nalunaarfigisinnaavaa suliaq eqqartuussivikkut malersuinertaqanngitsumik aalajangiivigineqarsinnaasoq. Taamaattorli</p>

	<p>tamanna taamaallaat pisinnaavoq pineqartup unioqqutitsinermit pisuunini nassuerutigippagu piffissallu erseqqinnerusumik taaneqartup, qinnuteqarnikkut kinguartinneqarsinnaasup, qaangiutinnginnerani, nalunaarummi akiliisitaassutissatut nalunaarutigineqartoq akilerniarlugu nalunaarutigalugu.</p> <p><i>Imm. 2.</i> Imm. 1-imi nalunaarummut oqaatigineqartumut tunngatillugu Kalaallit Nunaanni Eqqartuussisarneq pillugu Inatsimmi unnerluussutip imarisassai pillugit malittarisassat taamatutaaq matumani atuupput.”</p>
<p>§ 12 b. Malittarisassani, Inatsisartut inatsisaat manna malillugu pilersinneqartuni, aalajangersakkanik unioqqutitsinermit akiliisitaanermik pineqaatissiinermit malittarisassat aalajangersarneqarsinnaapput.</p> <p><i>Imm. 2.</i> Malittarisassani Inatsisartut inatsisaat manna malillugu pilersinneqartuni, aktiat anpartilluunniit tunngavigalugit ingerlatseqatigiiffimmit, piginneqatigiiffittut ingerlatsivimmit, peqatigiiffimmit, imminut pigisutut suliffeqarfimmit, aningaasaateqarfimmit, naalagaaffimmi oqartussaasunit, Kalaallit Nunaanni Namminersornerullutik Oqartussanit, kommunemit, kommunit ataatsimooqatigisaannit assigisaannillu unioqqutitsinerit akiliisitaanermik pineqaatissiissutigineqarnissaannut malittarisassat aalajangersarneqarsinnaapput.</p> <p>§ 12 c. Akiliisitaassutit §§ 12-12b naapertorlugit akiliisitsissutaasut nunap karsiata pisassarai.</p>	<p>24. § 12 b aamma 12 c atorunnaarsinneqarput.</p>
	§ 2
	<p>Inatsisartut inatsisaat ulloq 1. januar 2027 atuutilissaaq aammalu akiligassiissutinut § 1,</p>

	imm. 2-mi aamma 3-mi, aamma § 2-mi pineqartunut ilaasunut pilersimasunut tamanut atuulluni
--	--

Ilanngussaq 2

Tusarniaanermut akissuteqaatit pillugit allakkiaq

Siunnersuut pillugu makkuninnga tusarniaanermut akissuteqaat tiguneqarpoq: